

T1819/4334.8(4)

法華文句

卷
之
八
下

HARVARD-YENCHING LIBRARY
HARVARD UNIVERSITY
2 DIVINITY AVENUE

Gift of Mrs. James B. Pratt

DEC 27 1968

妙法蓮華經文句卷第七上

天台

智者

大師說

釋藥草喻品

此中具山川雲雨獨以藥草標名者土地是能生雲
雨是能潤草木是所生所潤所生所潤通皆有用而
藥草用強有漏諸善悉能除惡無漏爲最無漏衆中
四大弟子以譬領佛譬深會聖心佛讚善哉甚爲希
有述其得解以喻其人故稱藥草喻品夫藥草叢育
日久一蒙雲雨扶疏曄曄芽莖豐蔚於外力用充潤
於內譬諸無漏住最後身有餘涅槃更不願求無上



哈佛大學哈佛燕京
圖書館藏珍本
圖書部

佛道今得聞經自乘佛乘兼以運人文云我等今日
真是聲聞以佛道聲令一切聞內外自他具勝力用
故稱藥草喻品夫藥草者能除四大風冷補養五臟
還年駐色今蒙雲雨忽成藥王餌之徧治衆病變體
成仙譬諸無漏聞經破無明惑開佛知見文云我等
今日真是佛子無上寶聚不求自得佛子所應得者
皆已得之面於佛前得受記勃嘉著而稱微故言藥
草喻品前一番是師弟領述世界悉檀意也次一番
生善爲人意也次一番是對治第一義兩悉檀意也
是名因緣釋品餘約教本迹觀心準例可知不復記

云

云 此品是譬說中第三述成段舊云述其十三偈

歎佛恩深又述其教作人譬文言曲巧師云不應徧
爾經稱善說如來真實功德備述其領權領實明文
在此十三偈止是二乘齊教荷恩教作人譬是佛權
功德耳今言都述其周徧領解始天性結緣中間追
誘終於付財自微自著無量無邊諸恩德也其文爲
二一略述成二廣述成略述又二一雙述善哉二領
所不及雙述者一善哉述其兩處領實一善哉述其
兩處領權善說如來真實功德者真實是述實功德
是述權又華嚴之擬宜領實也三藏之誘引領權也

法華文句卷十一
方等之體信般若之領教俱領權實也法華之付財
專論實也辭致曲巧故言善說皆是佛法故言真實
誠如所言者印定之旨也又從如來復有下述其領
所不及云何不及謂退進橫豎亦橫亦豎非橫非豎
皆不及也所以者何大雲普覆徧荷清涼大雨俱霑
無不蒙澤咸令世間皆得知見未曾有法那忽齊教
止領二乘得益不道人天小草是爲退所不及菩薩
名上草亦名小樹大樹敷榮鬱茂自他饒益而復不
領是爲進所不及又十法界同成佛佛法界那忽止領
二乘餘八法界都不涉言是爲橫所不及又七方便

從淺至深皆入真實餘五方便都不在言是爲豎所
不及又三世利益未曾暫廢是爲亦橫亦豎所不及

夫山川谿谷

云

云

揔言一地一地能生未嘗揀擇攘

彼受此草木種子皆依於地更無餘依一雲變隼無
處不密一雨一味不隔枯榮普潤既同普得增長如
來平等不可思議實不先頓後漸初三末一如龍興
慶雲普雨於一切身心不降雨除熱得清涼是爲五
乘七方便十方三世平等廣大甚深博遠不可思議
無有差別是爲非橫非豎領所不及不及之旨非都
頓奪特以初心望後心未窮極地故云不盡耳又初

悟初阿亦具後荼功德但齊教之領未暇進領橫豎
周徧耳又權行大士宜應如此也廣述成又二長行
偈頌長行又二初述成開三顯一次從汝等迦葉下
結歎初有法譬合法中又二初先舉法王者不虛勸
信也次於一切法下正述開三顯一夫人王外無所
畏內不二言法王亦爾衆惡已盡發言誠諦舊云述
中根不虛獎下根信受今言佛法雖多不出權實權
實之外更無別法而言無量者此意難信故舉法王
勸信又爲下大雲譬作本從於一切法下約教明開
權顯實從如來觀知下約智明開權顯實由二教顯

二智由二智說二教智教相成也一切法者謂七方
便橫也對一實爲豎也若言不爾何故二萬億佛所
初發大心中間取小又流轉五趣又十法界一人尚
具況七方便耶此法雖多方便波羅蜜照之罄無不
盡以隨其類音說之無不逗會爲人天說戒善爲二
乘說諦緣爲三藏說事度爲通教說無生爲別教說
次第開如來藏是名述其領開三也從其所說法下
約教述其顯實也地者實相也究竟非二故名一其
性廣博故名爲切寂而常照故名爲智無住之本立
一切法故名爲地此圓教實說也凡有所說皆令衆

生到此智地顯實之文灼然如日云何闇寐作餘解
耶例大品廣歷諸法皆摩訶衍衍卽大乘乘卽實相
實相卽一切智地上文云唯此一事實指此地也餘
二則非真指七方便也此約漸頓二教述其開權顯
實也從如來觀知一切諸法下約智述開權顯實觀
一切歸趣是能照權也究竟明了者能照實也二智
所照偏圓兩境通達無礙故能說權實二教此舉智
釋教也知所歸趣是識藥深心所行是知病病藥俱
是權法權法各有歸趣戒善等近趣人天若作緣義
低頭舉手遠趣佛果念處道品等近趣涅槃若作福

德莊嚴汝等所行是菩薩道遠趣實所乃至六度通
別等法近遠歸趣途轍不同可解又戒善是人天藥
諦緣度是三乘人藥乃至通別等亦可解深心所行
有二種深心著於依正又深心著所執之法著依正
者起深重十惡鄣人天乘著所執法起四倒三道六
蔽四住五住等鄣諸聖乘當知深心病相不同權智
照之通達無礙又於諸法究盡明了者實智所照也
一切權法無不入實故言究竟實智所知故言了佛
眼所見故言明若此智照此藥此病不照彼藥彼病
彼智照彼不能照此種別不同者權智照也一智徧

法華文句卷上
五
照一切藥一切病實智照也能示衆生如此圓境智
故言一切智慧也又一切法者謂十法界也十法各
各相欲不同各獲果報歸趣亦異知諸法盡者名知
病知一切深心所著名知藥藥有深淺大品云如實
智知貪欲心瞋癡心以如實智知名知深心如理通
達無有鄣礙若戒善諦緣度等一切法藥悉用如實
智知者名通達無礙又權智文中通達無礙者約權
論實實智文中又於諸法諸法者約實論權二文互
現者此明實是權實權是實權當知究竟非權非實
非差別非不差別以智方便權有差別悉到智地則

無差別如地無差別草木若干若干無若干無若干
若干又如約心論法約法論心心有諸數法無諸數
心不離法法不離心無數而數數而無數耳權實亦
爾云從譬如下第二譬說文爲二初譬說後復宗
稱歎譬有開合開爲二一差別譬譬上述權教權智
二無差別譬譬上述實教實智也三草二木纖濃不
等故言差別一地一雨普載普潤故無差別若觀其
末派謂各各不同若究其根榮莫非地雨內合方便
智照七五各異實智往照終歸一實一實七五七五
一實差別無差別無差別差別云差別譬有六一

法華文句卷第七
九
土地二卉木三密雲四注雨五受潤六增長初土地
譬舊摠舉三千土地別出山川谿谷爲五乘習因谷
受水多譬菩薩谿譬支佛川譬聲聞山高受潤少譬
人天乘今謂習因應譬種子受潤增長而土地山川
雖有受潤闕於種子增長二義又下文合譬云普徧
世界天人脩羅頌偈云於諸天人一切衆中皆不以
土地等譬習因今所不用今以大千世界譬衆生世
間山川谿谷土地譬五陰世間世界無別法爲山川
谿谷土地所成衆生無別法爲五陰所成土地旣通
譬識陰山川谿谷譬四陰能依草木雖依土地等土

地等非卽草木草木質幹但名草木草木種子更無
別名但取能生之功名種子所生質幹名草木皆植
根於地地則本也內合習因習果雖依五陰五陰非
卽因果要依於陰得有習因增長成辦名習果果因
依陰而起則山川土地譬成草木種子受潤增長譬
悉成也又更顯別譬者山雖高峻亦有洿隆等五相
乃至土地雖平亦有丘池等五相卽譬五乘五陰山
高譬菩薩五陰川譬支佛谿譬聲聞土地譬天谷下
譬人一一五陰皆有習因習果所依猶如山川谿谷
土地皆爲種子質幹等所依也又用三千大千世界

譬正因之理通爲一切所依也山川谿谷土地譬衆生陰界入果報色心也草木叢林譬衆生習因此三法不相離習依陰入陰入不出法性如草木依山川山川依世界云云六文宛然云何作義又次第如此云何間糅經文抄著前後耶所生卉木下第二所生卉木譬卉是草之都名木是樹之總稱衆草成叢衆樹成林治病力用勝者稱爲藥如善法中皆能治惡而無漏善治惑義勝下卉木中樹林枝幹覆蔭廣器用大故喻二菩薩種類若干者五乘七善因果種子故言若干卽是種類各有稱謂卽是名也各有體相

卽是色也密雲下第三密雲譬雲有形色覆蔭下文有雷聲遠震覆蔭譬佛慈悲形色譬佛應世雷聲譬佛言教密雲卽三密也慈悲卽意密形色卽身密雷聲卽口密彌布者徧也旣密又徧故言彌布也以慈悲薰應身說法徧十法界故言彌布也經律異相云雲有五色青者風多赤火多黃白地多黑水多有四電師東身味南百主西阿竭羅北阿祝藍四電鬪諍是故有雷又水火風地鬪故有雷五事無雨一風起吹二火起焦三阿修羅手接入海四雨師淫亂五國王不理治雨師瞋故不雨云云一時等注下第四注

雨譬譬用口密八音四辯宣注法雨利潤衆生其澤
普洽下第五霑潤譬法寶普雨七種衆生心地所有
習因種子卽生聞慧名爲霑洽枝葉根莖者信爲根
戒爲莖定爲枝慧爲葉次第相資故譬此四也小根
莖等卽人天信戒中根莖等卽二乘信戒大根莖等
卽菩薩信戒諸樹大小下第六增長譬更復略牒明
其草木隨分受潤習報兩因善法旣蒙法雨習報兩
果各得增長稱其種性者明施權稱機小者不過分
大者不減少卽是七種習報兩因也花果敷實者習
報二果也又云增長卽三義稱其種性卽是增長之

由由設教稱機也各得增長正明增長花果敷榮卽
增長之相也雖一地所生下大段第二一地一雨無
差別譬顯於一實也此有三一一地所生道前心地
所生終因道後智地二一雲所雨一音所宣一乘法
門開發道中五種善根終是一音平等之教三三草
二木稟益不自覺知五種善根蒙佛法雨隨分增長
而不自知五種之因皆依一佛性亦不自知五乘之
教皆是大乘亦不自知同歸佛慧唯有如來能知也
迦葉當知如來下合譬也合差別譬爲二先正合次
提譬帖合差別譬有六今合不次第開譬明機前論

衆生合譬明應前合如來如來是化主也此中第一
正合上第三密雲亦兼合第一世界此中第二合上
第四注雨譬此中第三合上第一世界山川谿谷譬
此中第四合上第二草木此中第五合上第五霑潤
此中第六合上第六增長譬也合譬次第者明如來
應世則有八音說法說法卽有受化衆生衆生聞法
各霑道潤得潤是同不無差別增長云第一合密
雲先舉佛身密合雲有形後舉佛口密合雲有聲如
來亦復如是出現於世卽是正合應身出世也如大
雲起卽舉譬帖合明如來大慈現身覆育一切也以

大音聲者卽是舉佛口密合雲有聲也天人阿脩羅
者別舉三善道稟口密之益也卽是三乘根性三十
子別稟聲益也如彼大雲卽是舉譬帖合雲有聲也
徧覆大千者通舉一切皆是佛子俱蒙口密益也或
時但合五譬將普徧世界下兼合世界土地也世界
卽是國土世間天人修羅卽是假名五陰世間假名
合上世界五陰合上山川谿谷也於大衆中而唱下
卽是第二合上第四注雨譬先標章門次勸聽受章
門有六一十號謂如來應供等二四弘謂未度令度
等三三達謂今世後世等四一心三智謂知者具足

五五眼謂見者六三業共智慧行知道謂意不護開
道謂身不護說道謂口不護亦稱爲導師謂知道者
等也汝等天人下勸物聽受佛八音詮吐六種法門
從多爲論勸三善道宜應往聽法也爾時無數億種
乃至而聽法此中第三合上第一山川譬攬果報而
有衆生如依山山川得有世界等百千萬億者卽是十
法界衆生也今正語七方便衆生差別配如上說或
從汝等天人者皆合山川譬也如來于時乃至精進
懈怠卽是第四合上第二卉木譬舊云此文長出不
合上今明上譬中有卉木差別大小不同此中明根

有利鈍行有進怠正是習因深淺與卉木義同豈非
合譬而言長出于時者若論漸初一是鹿苑初說三
乘時若論中間處處得論于時利鈍者摠判三途因
惡果苦不能受道名爲鈍七種方便聞教得益名爲
利別判人天但受果報不肯受道名爲鈍三乘根性
斷惑出界名爲利又聲聞觀生滅名爲鈍菩薩觀不
生滅名爲利通別圓二三途放逸名怠人天持五
戒十善爲精人天不厭苦爲怠二乘怖畏無常爲精
二乘貪證不求作佛爲怠菩薩志求佛道爲進三
從隨其所堪至快得善利卽第五合上第五受潤譬

隨其所堪卽是稱會機宜無增減之失歡喜得善利
卽是各蒙法潤受益也是諸衆生聞是法已第六合
上第六增長譬現世安隱後生善處者卽是報因感
報果合花敷增長亦得聞法乃至入道者卽是習因
牽習果合上果實增長聞是法已合上增長之由現
世安隱正合增長後生善處者是合增長之相也佛
如大雲普覆一切三途亦得霑潤增長如說般若方
等明地獄得益也又諸經中亦說龍鳥鬼神等聞法
得道若火滅湯冷卽是現世安隱或生天上人中卽
是後生善處於天人中修道卽是以道受樂若人天

聞法持戒福德扶身鬼龍不犯卽是現世安隱或天
還生天人還生人或天人互生卽是後生善處生能
悟解卽是以道受樂二乘聞法得有餘涅槃是現世
安隱如下文云是人於所得功德生滅度想我於餘
國作佛更有異名此人於彼國得聞是經指方便有
餘之士是善處於彼聞經是得道受樂若生身菩薩
聞盧舍那佛說法得無生忍卽現世安隱後生淨滿
世界爲法身眷屬卽是善處以道受樂離諸障礙者
卽是現世安隱任力所堪漸得入道卽後世以道受
樂五乘者五戒乘出三途苦十善乘出入道入苦聲

聞乘出三界無常苦緣覺乘出從他聞法苦菩薩乘
出內無利智外無相好苦是爲五乘問但應以人天
爲世間乘餘是出世間乘又佛爲實乘餘是權乘又
佛爲果乘餘是因乘又應爲三乘人天爲下二乘爲
中佛爲上又人天名不斷煩惱乘二乘名斷煩惱乘
佛名非斷非不斷乘又人天名不斷佛名斷二乘名
亦斷亦不斷又凡夫賢聖非凡非聖有空非有非空
等乘云云大論明五善根勝鬘辨四藏與三草二木
云何人天爲二善二乘爲一佛菩薩爲五開大合小
五乘開小合大四藏合凡開聖五乘則凡聖俱開隨

緣不同耳如彼大雲下第二提譬帖合六意者大雲
帖合第一形聲兩益雨於一切帖合第二六章法門
卉木叢林帖合第四受化衆生利鈍怠進習因深淺
如其種性具足蒙潤帖合第五受潤得法利各得生
長帖合第六現世安隱增長也如來說法一相下第
二合無差別譬上開三今合亦三但不次第一相一
味下雙合一地一雨所謂下雙釋一地一雨其有衆
生下合上而諸草木各有差別所以者何下釋於差
別如來能知差別無差別一相者衆生之心同一真
如相是一地也一味者一乘之法同詮一理是一兩

也昔於一實相方便開爲七相於一乘法分別說有
七教佛知究竟終歸一相一味也所謂下雙釋一相
一味衆生心性卽是性德解脫遠離寂滅三種之相
如來一音說此三法卽是三味此三相則以爲境界
緣生中道之行終則得爲一切智果故言究竟至於
一切種智也合草木差別譬如後解不重記有時作
三意合一無差別意合上一地一雨二差別意合上
草木差別三如來能知釋成兩意無差別者謂一相
一味一相合上一地也解脫相者無生歿相離相者
無涅槃相滅相者無相亦無相唯有實相故名一相

一相卽無住本立一切法無住無相卽無差別也立
一切法卽有差別差別如卉木無差別如一地地雖
無差別而能生桃梅卉木差別等異桃李卉木雖差
而同是一堅相若知地具桃李卽識實中有權解無
差別卽是差別若知桃李堅相卽識權中有實解差
別卽是無差別以是義故以一相合上一地譬也一
味卽是實教純一無雜例一相可解解脫者無分段
變易二邊業縛故名解脫相離相者得中道智慧此
慧能遠離二邊無所著故名離相滅相者二邊因滅
得有餘涅槃二邊果滅得無餘涅槃故名滅相句句

例作差無差別義準一相可解究竟至於一切種智者若得二邊滅相卽是通別二惑盡入佛知見以一切種智心中行般若初發畢竟二不別故言究竟此卽佛之智慧故言一切種智也從其有衆生聞如來法不自覺知者卽是明差別義從此下明差別者衆生是山川假實之差別亦是種子之差別如來卽是雲聞法卽是雨讀誦修行卽是潤功德卽增長如此等差別皆不能知也就文爲五一衆生不知二如來能知三舉譬帖合衆生不知四牒前結釋如來能知五釋疑其有衆生者舉不知之人法謂聞一音之法

持說者是正明不知持說不同修行各異人天作戒善之解三乘作諦緣度解解旣不同卽是差別所得功德不自覺知者明五人雖各稟教不知佛是一味無差別教亦不知七種方便各各作解而各執已解爲實此則不知於權亦不識實卽是差別不自覺知也第二如來能知略減數舉十境合爲四意一約四法知二約三法知三約二法知四約一法能知約四法者謂種相體性種者三道是三德種淨名云一切煩惱之儔爲如來種此明由煩惱道卽有般若也又云五無間皆生解脫相此由不善卽有善法解脫也

一切衆生卽涅槃相不可復滅此卽生成爲法身也
此就相對論種種若就類論種一切低頭舉手悉是解
脫種一切世智三乘解心卽般若種夫有心者皆當
作佛卽法身種諸種差別如來能知一切種祇是一
種卽是無差別如來亦能知差別卽無差別無差別
卽差別如來亦能知相體性約十法界十如中釋若
論差別卽十法界相若論無差別卽一佛界相差別
無差別如來能知差卽無差無差卽差如來亦能知
體性例然可解從念何事下約三法明如來能知三
法者卽是三慧仍有三重一曰慧境二曰慧體三曰

慧因緣念何事是明三慧用念取於所念之事卽是
三慧境從云何念者念是記錄所聞之法正是念慧
之體也從以何法念下卽是三慧取境聞法是其因
緣又三慧境境智因緣合故得有三慧法復名因緣
也如此三乘三慧昔謂境體因緣有異卽是差別若
入圓妙三慧卽無差別此有差別無差別如來能知
又差卽無差無差卽差如來亦能知從以何法下約
二法明如來能知以何法卽是因得何法卽是果五
乘之因各得其果卽是差別衆生如佛如一如無二
如唯是一因一果卽無差別差別無差別如來亦能

知差卽無差無差卽差如來亦能知從衆生住於種種之地是約一法如來能知七方便住於七位故言種種之地此卽差別如來用如實佛眼見之如衆流入海失於本味則無差別隨他意語以智方便而演說之則如來能知差別其所說法皆悉到於一切智地則如來能知無差別云云從如彼卉木下第三舉譬帖合衆生不知也從如來知是下第四牒前總結能知也一相一味等如前釋一相一味解脫離滅等爲緣分別卽是一中無量究竟涅槃終歸於空卽是無量中一此是牒前重釋無差別也何者一相一味

解脫離滅若是二乘法體猶是差別言宣今作大乘究竟涅槃終歸於空卽通無差別究竟涅槃結前諸句皆非二乘有餘無餘乃是究竟涅槃也常寂滅相者結諸句非是小乘寂滅乃是常住寂滅上文云諸法從本來常自寂滅相卽此義也終歸於空者非是灰斷之空乃是中道第一義空卽重抵掌簡實異權舊云終歸於空者雖復神通延壽無量示現復倍上數壽盡終歸灰斷故言終歸空此苦佛苦經那可言光宅云終歸入有餘捨無常身智也有人難此解若爾與二乘何異經文舉兩究竟初究竟至於一切種

智此舉智果對二乘智非究竟二舉究竟涅槃常寂滅相終歸於空此舉斷對二乘斷非究竟究竟之文知非小乘空也龍印云大涅槃空無法相無煩惱故名空終歸常住第一義空忠師云終歸第一義空智慧有人云佛果無累故言空注者云空有洞遣乃名空古諸師皆不作小解光宅何意獨然佛知是已觀衆生下第五斷物疑佛昔既知始末皆一何不鹿苑卽爲說實釋云觀衆生心欲隨三悉檀而將護之恐其誹謗故不卽說也汝等迦葉下第二復宗稱述欲釋疑疑者聞佛無量功德謂四弟子齊教領解何必

是實故佛稱述雖未及佛地齊教不虛也亦是引發下根令同得悟文爲二初述二釋先歎希有者凡夫有反復聞能得益菩薩是已事解不多奇無爲正位能捨證入實甚爲希有能知隨宜說法述能領開三次言能信受卽述其領顯一所以者何釋述意明佛於一道說三深玄難解而汝能信也私謂前文云如來復有無量功德汝等說不能盡後文云汝等甚爲希有者佛恩普被猶如雲雨靡不覆潤佛恩普載猶如大地靡不生成豈有爲一機一方而已故言汝等說不能盡佛恩雖普衆生日用不自覺知如三草二

法華文告卷七
木植根乎地稟潤乎雨而不能知汝等能知始終十
恩甚爲希有未度令度等述其知佛四弘誓恩甚爲
希有衆生現世安隱後生善處以道受樂述其知大
慈與樂恩甚爲希有旣聞法已離諸鄣礙任力所能
漸得入道述其知大悲拔苦恩甚爲希有輪王釋梵
是小藥草述其知勸善除熱惱恩甚爲希有知無漏
法能得涅槃及緣覺證是中藥草述其知除諸熱見
愛恩甚爲希有上草小樹是爲耻小慕大述其知遮
醜之恩甚爲希有大樹是述其莊嚴之恩甚爲希有
最實事一地一雨述其知付財坐座身心財法自在

安樂之恩甚爲希有佛述其差別歎者歎十恩文盡
若述其無差別歎者卽是一大恩也偈有五十四行
半頌上開顯開顯有法譬今皆頌初四行頌法說次
五十行半頌譬說法說復二先舉法王二則開顯今
初半偈頌法王不虛下三行半頌開顯上文二教二
智今亦具頌初一行半頌二教後二行頌二智初隨
衆生下半行頌權教次如來尊重下第二一行頌實
教次有智若聞下一行頌釋權智後是故迦葉下一
行頌釋實智隨種種緣說種種教悉爲令得大乘正
見自此之前皆名邪見也此頌是如來四悉檀意破

有法王卽對治意隨衆生欲卽世界意智聞信解疑
悔永失是爲人意令得正見第一義意三悉檀卽頌
上以智方便而爲演說令得正見頌上到一切智地
云迦葉當知譬如下五十行半頌上譬說初十行
半頌開譬次四十行頌合譬上開二譬今初九偈半
頌差別譬次一行頌無差別譬上差別有六今亦頌
六而不加長行開譬如合次第也初三行頌第三雲
譬其雨普等下第二一行頌第四注雨譬次山川險
谷下第三一句頌第一土地山川譬次幽邃下第四
二句頌第二卉木譬次大小諸樹下第五兩行三句

頌第五受潤譬一切諸樹下第六二行頌第六增長
譬雲譬應身應身隨智慧行故言慧雲能具十二部
法故言含潤也若應身不說法如須扇多多寶者此
雲不含潤也身放大光如電耀口震四辯如雷聲也
九十五種邪光不現故言掩蔽除九十八種惱熱如
地上清涼也如可承攬者應身降世似同三有有心
往取實不可得也八音四辯宣注法雨四方俱下一
時俱聞亦云四等也凡有心者皆蒙利潤故言率土
充洽也此則成上又成下山川譬也山川險谷一句
頌第一土地卽是七方便衆生五陰今蒙法雨身口

柔軟如土地得澤也幽邃所生者是頌上第二衆生
習因差別譬衆生久遠所植習因隱在陰界入內故
言幽邃今蒙法雨悉得開發故言所生百穀語通取
五穀譬五乘能生百善也甘蔗蒲萄譬定慧乾地普
洽譬未信者令信也蘇譬如文如其體相性分大小
下一行頌第二無差別譬上文有三此中略不頌一
地而所生兼之初二句頌所生所潤次一句頌能潤
則是頌無差別也而各滋茂頌差別不自知也佛亦
如是出下四行頌第二合譬初三十五偈頌合差
別次如是迦葉下五行頌合無差別上合差別譬前

正合後譬帖今頌亦先合次便舉譬帖初一行頌合
雲譬上兩句以身合雲下兩句舉譬帖合次既出下
第二有八行半頌第二合雨譬上先標章門次勸聽
受既出下三行略頌十號次一行半頌四弘六章門
中但頌二章也充潤一切下一行半是頌四弘誓諸
天人下第二四行頌勸聽受我觀一切下第三四行
頌第三合上山川譬山川譬七種五陰衆生如雨注
不擇谿谷佛平等說故無彼此有機爲此無機爲彼
植善爲愛憎逆爲憎佛事爲自魔事爲他應初爲來
應後爲去入實爲坐出權爲立佛觀衆生爲若此卽

法華文句卷之三
是等雨山川之意頌上無數億種衆生來至佛所而聽法也貴賤上下下第四二行頌上第四如來于時觀是衆生合第二所生草木叢林貴賤乃至利鈍約七方便傳傳作之也一切衆生聞我法者下第五十一行頌上種種無量皆令歡喜合受潤譬文爲三初一行揔明受潤次或處人天下第二七行別明受潤次三行結所潤能潤有人解人天爲小草二乘爲中草外凡大草內凡爲小樹初地至七地爲大樹有人以內凡爲大草初地至七地爲小樹八地爲大樹有人以三十心爲大草初地至六地爲小樹七地去

爲大樹然三草二木佛自合喻明文朗然云何師心反佛違經耶就別受潤中文爲五初一行人天俱未斷惑合爲小草次知無漏法下第二二行明二乘俱有斷證合爲中草次求世尊處下第三一行明六度志求作佛化他勝二乘獨爲上草次又諸佛子下第四一行半明通教已斷通惑誓扶餘習涉有化他望下爲優比上爲劣故名小樹次安住神通下第五一行半明別教自行化他高廣爲勝故名大樹約三菩薩各作三樹六度約三僧祇通教約七八九地別教約三十心佛平等說下第三三行結所潤能潤又二

法華文句卷之三
三

初一行半舉譬帖釋所受潤雖明七種七種爲少如
海一滴佛以此喻一行半明能潤佛智多如海也我
雨法雨下八行半頌第六諸衆生聞此法已合歡喜
增長譬又二前兩行摠頌增長又二初一行摠頌增
長次一行舉譬帖釋次諸佛之法下六行半別明增
長爲四初一行半明人天增長普得具足是頌現世
安隱漸次修行是頌後世以道受樂次聲聞下第二
一行半頌二乘增長住最後身有二解一云二乘此
身若不值佛身未必無後由見佛故成最後身卽是
增長義二云二乘得有餘涅槃住最後身得佛五味

調熟得入法華聞大乘得解卽是增長若諸菩薩智
慧堅固下第三一行半是通教增長堅固是體法慧
了達三界是斷惑盡復有住禪下第四二行是別教
增長云問一雲一雨與一音同異答下地以一音
令他聞一法佛以一音隨類各解今一雲一雨正是
隨類之一音也有人解法身不二名一從法身出音
故言一音有人言一時並出衆聲故言一音有人言
五音之中隨用一音大論明一音報衆聲不言並出
亦不言是法身出音毗婆沙言佛以一音說四諦五
人聞人語八萬諸天聞天語地獄夜叉各聞同其語

唱告至梵天是爲梵音亦是佛報得清淨音聲最妙
號爲梵音若報得梵音則人所不聞聞亦不解如是
迦葉下第二五行頌上無差別譬又爲二前一行半
頌無差別之差別後三行半頌差別無差別譬如大
雲如一味雨卽頌合上一味雨無差別也潤於人華
各得成實卽是頌上差別也次迦葉當知以諸因緣
下卽是明權權卽差別合上所生也今當爲汝者卽
是顯實實卽無差別合上一地也非滅度者未度變
易也獨言二乘者爲其保證強也人天不計果爲涅槃
樂菩薩不中間取證也是菩薩道者菩薩行道亦須

斷通惑汝已斷盡卽是菩薩道法華論謂發心退已
還發前所修善不滅同後得果二乘智斷是菩薩道
者二乘執其果故斥言是菩薩道道卽因也問菩薩
亦有果信解云得道得果小品云有法是菩薩道無
法是菩薩果何故不言是菩薩果答此義亦應得今
言若道若果皆是佛因因卽是道也

釋授記品

梵音和伽羅此云授記諸經破受記淨名云從如生
得記從如滅得記如無生滅則知無記思益云願不
聞記名小品云受記是戲論今經云何答若見有記

記人此見須破菩薩誓記此記須與世諦故記第一
義故無四悉適時如下說若通途記如法師品初若
別與記如三周後說若正因記如常不輕若緣因記
如法師品十種供養若了因記如授三根人若正因
記則廣若緣了記則狹或遲記或速記或佛記如此
文或菩薩記如不輕雖無劫國之定亦得是記復懸
記如化城品未來弟子是也他經但記菩薩不記二
乘但記善不記惡但記男不記女但記人天不記畜
今經皆記若首楞嚴有四種記今經具之未發心與
記如常不輕品發心現前無生三周記是也瓔珞第

九八種授記已知他不知衆人盡知已知不知已知衆俱
知已知衆俱不知近覺遠不覺遠覺近不覺俱覺俱不
覺已知他不知者發心自誓未廣及人未得四無所
畏未得善權故衆人盡知已知不知者發心廣大得無
畏善權故皆知者位在七地無畏善權得空觀故皆
不知者未入七地未得無著行云云遠者不覺者彌
勒是也諸根具足不捨如來無著之行故近者不覺
此人未能演說賢聖之行師子膺是也近遠俱覺者
諸根具足不捨無著之行柔順菩薩是也近遠俱不
覺者未得善權不能悉知如來藏等行菩薩是也餘

經又云近知者從現佛得記也如彌勒等遠知者不從今佛從當佛得記如佛語弊魔彌勒當與汝記近遠俱知者今當佛俱與記也近遠俱不知者今當佛俱不記也元諸佛本爲大事因緣出世今衆生開示悟入佛之知見今大事已顯佛已說竟衆生已入暢佛本懷衆生願滿法應與記如父遇子豈不付財又行人無量世行願願在今佛文云其本願如此故獲斯記此兩緣是世界悉檀故記又二乘聞經改小入大圓因已足因必招果故如來與記時衆咸知發願願爲生身法身內外眷屬或願但生彼土饒益衆生

此兩是爲人悉檀與記又授二乘記破欲退大入小菩薩何者若定有二乘可退爲小今無二乘何所可退又破欲發二乘心者彼證自捨我何爲取又破未改小者則便改小將證小者卽不取證此四對治悉檀與記又無生現前必由實解開佛知見不謬又明了佛性故與受記小乘入實決定作佛若爾一切衆生亦有佛性何不與記然衆生但正無緣今聞經信解緣正具足開佛知見知佛性見佛法見佛性此兩第一義悉檀與記此四記攝止諸受記盡云授記亦云受記受決受蒞授是與義受是得義記是記事

決是決定剗是了剗中根人聞法譬二周開三顯一具足領解如來述成雖自知作佛而時事未審若蒙佛誠言授其當果劫國決定近遠了剗則大歡喜今從佛授與得名故言授記品此文是譬說第四段上三段皆以譬喻說之此中授記亦用譬喻論記何意無第五段一解云指上指下略不論耳又云草喻中明一切受潤各得增長審知四衆皆獲利益經家略不出耳文爲二一正與中根授記二許爲下根宿世之說初又二先授迦葉次授三人並有長行偈頌迦葉長行中有六一行因二得果三劫國名字莊嚴四

壽命五正像久近如文六國淨三弟子中復二一請記二與記請記中七偈初一行正請次二行半開譬次二行半合譬次一行結三人記各有行因得果劫國壽命法住數量悉如文從我諸弟子下二行半許爲下根更說宿世此人已聞法譬復見上中受記而猶疑不了深生愧耻欲增進其道先許摠記更說宿緣

緣
云

妙法蓮華經文句卷第七下

智者 大師說

○釋化城喻品

化者神力所為也以神力故無而歛有名之為化防非禦敵稱之為城內合二乘涅槃者權智所為也以權智力無而說有用教為化防思禦見名為涅槃蘇息引入實未究竟而言滅度權假施設故言化城喻如前說此是因緣釋也約教者若三藏義者於涅槃生安隱想生滅度想若通教二乘與三藏同菩薩不爾釋論云如父過險一腳入城一腳門外憶妻子故

從城入險誓願扶餘習入生歿而不以空爲證也別
教不道城如化用城防險從城門徑過將城作方便
斷見思惑不道此爲極也圓教知無賊病亦不須城
故言化城也今是圓教意故題爲化城喻品也本迹
觀心不記問此品說因緣事下根得悟應名宿世品
答品初廣說因緣末則結譬化城若從前應稱宿世
經從末故言化城又上根疑薄但取道樹三七思惟
以明機緣中根疑濃加以譬喻採取二萬億佛所教
無上道以爲機緣下根疑復厚則明宿世久遠機緣
若從宿世之始明久遠因緣語其中間言其化城明

其究竟言其實所經家處中標品收得初後從此義
便故言化城品問化城是權實所是實何意棄實從
權答由知城是化則知實所是實故標化不失實也
此段三品經文例前應四但領解述成皆在授記段
中何者若不領解安得授記述成故兼得二意又領
解述成得記或前後不定領解或默念發言不同其
文少不足分品但入他段中此品正說因緣後兩品
授記初又二一先明知見久遠二明宿世結緣如來
三達遠明如見今日所引往事決定不虛然後說宿
命也此二各有長行偈頌初長行有三一出所見事

卽是好成大相大通勝佛也二舉譬明久遠三結見
昔如今云偈有七行頌前三義如文佛壽五百四
十下正明結緣又爲兩初結緣由二正結緣由中又
兩遠由近由遠由又二一大通智勝佛成道二十方
梵請法成道爲五一佛壽長遠其佛本坐下第二成
道前事但諸佛道同爲緣事異釋迦苦行六年草生
攢脰至肘不覺諸天哭喚動地不聞移坐得道彌勒
卽出家日得道彼佛十劫猶不現前非根有利鈍道
有難易緣宜奢促應示長短耳三諸比丘大通過十
小劫下明正成道四其佛未出家下明成道後眷屬

供養五爾時十六王偈讚下明請轉法輪第一文易
解第二成佛前事有二一佛坐道場所經時節二諸
天供養佛告諸至得三菩提時下第二諸梵請文爲
二一威光照動二十方梵請初威光者過去因果經
云薩婆悉達處胎時三千國土朗然大光日月所不
照處大明其中衆生各得相見初成道時亦如是朝
爲色天中爲欲天晡爲鬼神說法夜亦如是觀解忽
生衆生者心性本淨陰入界覆之則闇若修觀慧本
性理顯又兩山是二諦其間是中道日月光是一智
佛光是中道無分別智光照本有三諦洞明也爾時

東方下第二十方梵文爲二先九方後上方九方爲
四一東二東南三南四摠明六方前三方梵文各有
七一觀瑞二驚駭三相問決四尋光見佛五三業供
養六請法七默許皆如文上方梵止有六世尊卽說
故無默許舊云東東南南請小七方請大上方請小大
若釋論明梵本請大佛雖說小未遂所請若說般若
猶酬梵請耳若依方便品文梵王請大然佛法道同
不應偏請但經論存略諸師偏據耳又如今佛自始
至終具轉五味法輪一一皆酬梵請彼亦應然初十
六子請轉滿教如今佛說法華嚴東東南二方請轉半

教如今佛說三藏後七方請轉對半明滿如今佛說
方等上方梵請帶半明滿如今佛說般若後十六子
請廢半明滿如今佛說法華醍醐教也今古節目文
義相應云爾時大通智受十方下結緣近由由佛
受請說法故後得覆講正作結緣文爲二一先轉半
字法輪二諸子請轉廢半明滿字法輪初爲三一受
請二正轉三聞法得道此中應說三乘如序品文而
今不說者正爲下根論結緣開顯等略不言六度耳
三轉者謂示勸證云亦將三轉對示教利喜示卽
示轉教卽勸轉利喜卽證轉也亦對見諦思惟無學

法華文句卷下
四
也爲聲聞三轉爲緣覺再轉爲菩薩一轉何故爾由
根利鈍此一往說耳通方例皆三轉何故三轉諸佛
語法法至於三爲衆生有三根故大論及婆沙悉作
此說問初爲五人云何作三根耶復有八萬諸天何
故無三根爲生三慧三根三道故十二行者一約四
諦教二約十六行教十二者卽示勸證是也行十二
者三轉皆生眼智明覺又教十二爲能轉行十二爲
所轉十二行是輪十二教非輪若作二輪義眼智明
覺者約四十八法開此四心成十六心謂苦法忍爲
眼苦法智爲智比忍爲明比智爲覺餘三諦亦爾故

成十六心三根人各得十六心故成四十八行也十
二諦是教法輪十二行是行法輪教輪則能轉唯是
一權智所轉則有十二教也若行法輪能轉之教有
十二所轉之行亦十二或通三人或約一人今就見
諦道三人利根聞示轉卽生眼智明覺三人合舉故
言十二行也所不能轉者沙門不聞尚不能知何況
能轉支佛雖悟口不能說婆羅門雖聞其名不解其
理魔梵亦爾夫轉者轉此法度入他心令彼得悟破
六十二見乃名轉法輪爲無此義魔梵等所不能轉
也有解大乘四諦次轉二諦次轉一諦次轉無諦皆

是卷舒之意小乘四諦以生滅爲體大乘以無生爲

體云十二因緣者還是別相細觀四諦耳約苦集

卽有無明老死約道滅卽有無明滅乃至老死滅也

又三人通觀十二緣二乘生滅十二緣爲菩薩無生

十二緣無生十二緣本不生今不滅相生則相生傳

傳滅云又三乘亦通論四諦二乘有量四諦爲菩

薩無量四諦又六度亦通三人小品發趣品云阿羅

漢支佛因六波羅蜜至彼岸攝大乘云凡夫二乘皆

有六度但不同耳若爾應俱名波羅蜜然二乘行到

涅槃彼岸亦稱波羅蜜但不能到佛道彼岸比菩薩

異耳阿毗曇有六足六足卽六度寶雲經明三乘毗

尼云第三聞法得悟者初少中多不受者不受四

見悟初果也得解脫者脫子果兩縛得無學也深妙

定者卽俱解脫也云爾時十六王子皆出家下第

二重請滿字法輪文爲七一出家二請法三所將亦

出家四佛受請五時衆有解不解六時節七說已入

定諸根者六根也六根清淨故言通利又六根互用

故言通入佛境界故言利智慧明了者開示悟入也

彼佛初說圓頓諸子大乘功德悉皆具足愍諸方便

重請佛開權顯實也聲聞皆已成就者明其障除機

動是故爲請我等志願如來知見者此法華經但明佛之知見唯志於此卽正請滿字廢半之文明顯若此也過二萬劫者上開三旣久不容中間無事望下文意二萬劫中必說方等般若文云說六波羅蜜及諸神通事般若是行神通是事諸方等經多明不可思議事行也頌中又云分別真實法卽是大品明實相般若意也十六沙彌信受及二乘卽信得解者其餘千萬皆生疑惑是不解衆此不解衆卽與十六子結法華之緣者也第七明說法已入定此正是結緣之近由由佛入定不出諸疑惑衆無所諮問十六於

後爲不解者覆講說經也文中明入定處所卽是靜室正入定卽是住於禪定入定時節卽是八萬四千劫云是時十六菩薩知佛入室下第二正結緣就云此有二先法說結緣次譬說結緣就法說有三第一明昔日共結緣第二明中間更相值遇第三明今還說法華第一有四一者知佛入定二者王子覆講三者衆得利益四佛從定起稱歎菩薩由佛入定所以得說佛知一化將畢不復熟此段之人故令王子共其結緣又知此等必由王子究竟得度所以入定久而不出也云是十六沙彌下第一知佛入定各升

法座下第二覆說法華一一皆度下第三說法利益皆發菩提心故云度若初發心時誓願當作佛已過於世間卽是度七方便彼岸義也大通智勝過八萬下第四佛從定起稱歎勸信此中復二一正稱歎菩薩二汝等皆當下勸物親近勸物親近中又二先勸親近次所以者何下第一釋勸意佛告諸比丘是十六下第二明中間常相逢值逢值有三種若相逢遇常受大乘此輩中間皆已成就不至今若相逢遇遇其退大仍接以小此輩中間猶故未盡今得還聞大乘之教三但論遇小不論遇大則中間未度于今

亦不盡方始受大乃至滅後得道者是也問如上塵數多許時節今始得羅漢當知無生法忍何易可階答一云大聖善巧依四悉檀作如是說或說佛道長遠或說佛易得對治厭道長者說短於道生輕易想者說長或爲發生宿善或隨世間所欲或爲聞說長短卽得入第一義當知言如許劫方今得羅漢者此是權行四悉檀引諸實行令入道耳諸比丘我今語汝彼佛下第三明今日還說法華此文復二先會古今後明還說法華先會古今復二一結師之古今二會弟子古今十六沙彌是古八方作佛是今也諸比

丘我等爲沙彌各各下次會弟子復二一會現在二會未來現在復四一不退者住三菩提也二此諸衆生退轉者今住聲聞三所以者何下釋退住意四爾時所化無量下正結古今也及我滅度未來下第二會未來弟子復二一正會二我滅度後復有下釋疑疑者云現在者得聞佛說法華得入一道可是結緣之流未來者不聞法華而入滅度此豈能捨小得入一乘釋云雖滅度之終會得聞我於餘國作佛得聞是經餘國者三乘通教有餘國也除諸如來方便說者斷疑也三是方便說其實無三也諸比丘若如來

下第二正明今日還說法華就此復三一時衆清淨二正說法華三釋前開三意涅槃時到者諸佛出世教道將畢之時卽說此經如迦葉佛日月燈明等說此經竟卽入涅槃釋迦說法華竟仍唱當滅衆又清淨者卽斷德也信解堅固者信卽四不壞信解卽無漏正解了達真諦具諸禪定此智斷立也爾時堪教大道聞必信受也復次衆又清淨者得三藏教益免難也信解堅固者於方等教心相體信也了達空法聞般若教說法於空法中心得了達卽轉教意也便集諸菩薩下正說法華集菩薩是聚親族等是說此

經也上釋親族法身大士影響衆以此文驗之其義明也集諸菩薩是會親族及聲聞衆是命其子也比丘當知如來方便下釋開三意也若世無二乘得滅度者何故如來前說權教釋云比丘當知如來方便深知衆生有小性欲著於五塵弊於五濁故先說三令破蔽免難後說一也譬如五百下第二譬者有開有合開譬爲二第一導師譬譬上覆講共結大緣卽擬火宅之揔譬方便之略頌也第二將導譬譬上中間相遇今還說法華也若中間相逢從我聞法皆爲三菩提者不爲此人設譬若中間相逢于今有住聲

聞地者正爲此人設第二譬也卽擬火宅之別譬方便之廣頌就初導師譬其文有五卽擬火宅揔譬方便略頌中之六意也一五百由旬譬譬上未度之衆樂著諸有輪迴處所卽擬火宅中其家廣大三界無安方便品安隱對不安隱處之意也二險難惡道譬譬上未度之衆煩惱垢重於如來智慧難信難解卽擬火宅中火起方便品安隱對不安隱之法也三若有多衆譬正譬上百千萬億種皆生疑惑不解之衆生也卽擬火宅中三十子五百人方便中知衆生性欲意也四欲過此道至珍寶處譬舊不取今取此譬

譬上覆講法華擬草喻中一味雨火宅中唯有一門
方便品宣示佛道意也五者一導師譬譬上第十六
王子也卽藥草中密雲火宅中長者方便中我今亦
如是意也問此中作譬那不作父子相失長者驚入
火宅不虛等名耶荅凡作譬名各逐義便上取機感
有無故言父子相失父子相見若取感應始赴機故
言驚入火宅此中明將導衆人世世相值那得言相
失先久結緣那得言始應爲此義故不作相失驚入
名耳而其意則通問何故不作不虛譬荅上來已二
十二番開權顯實其義已彰不虛本欲勸信下根信

在不久故不須也五百由旬者基師三界結惑爲三
百七地所斷習氣爲四百八地已上所斷無明爲五
百今謂非正別義又非三乘通義又有家云流來生
死變易生死中間生死分段生死但取三種開爲五
百不取流來流來是有識之初反源之始故不說之
有人難此云勝鬘云因五果二果二者謂分段變易
因五者謂五住語果旣別開流來與中間語因亦應
更廣五住無據不可用大論明肉身菩薩卽分段法
身菩薩謂變易又云阿羅漢捨三界報身受法性身
故知生死二耳有人云三百喻三界四百喻七地二

國中間難過五百喻八地已上難者言四百喻七地則應三百喻六地六地與二乘齊功二乘極久唯六十劫或百劫菩薩至六地時二十二大僧祇二乘於佛道紆迴不應得齊今謂此非別義亦非通義有人言三界爲三百七住及二乘爲四百七住已上爲五百如大經云初果八萬劫至菩提心處如三根人至此處卽領解五種人至此處名度五百也此取極鈍故云八萬劫到利人不必爾如佛世得四果者聞法華皆發心何必八萬劫難云經明度三百由旬立二地豈是度三人也若五人並發菩提心名度五百者

乃大經之一意明五人發心離於五位非此中意此中明三百是權度在化城五百至寶所名實度廢化城進寶所若五人皆度皆進失化城譬意有人云三界爲三百聲聞爲四百緣覺地爲五百凡夫三界障二乘涅槃障亦是有空二見華嚴藥樹不生深水火坑火坑卽三界深水卽二乘三界是二乘之牢獄二乘是菩薩之牢獄又是福智二邊不能自行不能化他大品明四百由旬合二乘爲一百法華開爲五百大品明菩薩度凡聖二地未明二乘是權闕化城之意旣未論化城亦未明寶所答大品已顯實故辨實

所未開權不明化城下文云爲止息故說二涅槃此
令度三百由旬也汝所住地近於佛慧此令出二百
由旬也文旣分明無勞惑也又明二乘六義同十義
別同出三界同盡無生同斷正使同得有餘無餘同
得一切智同名小乘所以合爲一化城別開十義行
因久近六十劫百劫故根利鈍從師獨悟無悲鹿羊
有相無相觀略廣能說得四果法不能說法得煖法
在佛世不在佛世頓證漸證多現通少說法聲聞不
定火宅三車今爲二百三根同爲火宅所燒三根求
出故三車佛道長遠二乘是惡道故二百須離佛乘

非障但明二百何故約凡開三約聖開二此引進之
言耳所度猶少未度猶多若爾未成了義佛道雖長
如萬里行但五百是難餘者則易問二百是二乘難
三界是凡夫難菩薩有難不菩薩不以火宅爲難不
應求車而出旣求車出何不爲二百所障云大論
六十六云險道是世間一百由旬是欲界二百色界
三百無色界四百是二乘又倒出數一百是二乘道
二百是無色三百是色界四百是欲界此經明五百
由旬卽菩薩道若過五百卽入佛道云人師及經
論異出如前今依此經判之三界果報處爲三百有

法華文句卷第七
餘國處爲四百實報國處爲五百下文合譬云知諸
生歿生歿卽是處所明矣 但佛旨難知更須廣解
見惑爲一百五下分爲二百五上分爲三百塵沙爲
四百無明爲五百下文合譬云煩惱險難惡道義相
扶也入空觀能過三百入假觀能過四百入中觀能
過五百下文合譬云善知險道通塞之相卽雙知因
果二種五百義相扶也二險難惡道者譬生歿因果
也分段變易此卽果險難也見思五住卽因險難也
由此因果故言惡道也無人者道有二種一曠絕有
人可依二無人可依譬生歿中有涅槃煩惱中有菩

提雖復曠絕則有人可依若生歿煩惱無涅槃菩提
藥中無病病中無藥此則曠絕無人可依也三若有
多衆者此譬王子所化未度之衆也四欲過此險道
求至種覺故言至珍寶處也五有一導師者卽第十
六王子也眼耳清淨曰聰意清淨曰利揔而言之卽
六根清淨也智卽一心三智也明卽具足五眼也又
三明爲明十力爲達將導衆人下是第二將導譬此
與火宅方便別譬廣頌意同也就此文爲三一所將
入衆譬譬本結緣未得度者本緣不失而爲導師所
將同上火宅長者見火驚怖方便品見五濁而起大

法華文合卷十一
悲心二中路懈退譬譬上中間相值退大乘心卽以小接與火宅中不用身手而歎三車希有方便品息大乘化念用方便意也三爾時導師知此人衆下滅化引至寶所譬譬上還爲說法華經便集菩薩及聲聞衆爲說此經卽與火宅賜一大車方便中但說無上道意同也分文竟次釋文初所將人衆者通是結緣之衆也若別論者昔得大益被將已竟未得大益正是所將若約五百人三十子中未得開悟之人也中路懈退者卽是第二譬文爲二一退大二接小退大擬上息一接小擬上施三退大文爲三一中路懈

退卽擬上無大機二白導師言擬上不受勸誡我等疲極卽是不受勸門而復怖畏卽不受誡門三不能復進者卽擬上息化也分文竟次釋者初中路者非是半途名中路但以發心爲始至佛爲終此兩楹間而起退意故名中路第二白導師言者自有通途慈悲導師如文云有一導師將導衆人者是也自有結緣導師如文云所將人衆白導師言是也自有權智導師如文云導師多諸方便者是也自有實智導師如文云導師知此人衆是也今言白導師者正白結緣之導師也以其退大則大滅接小則小生一生一

滅感於法身呼此爲白王子知其退大卽是聞其所
白善根微弱無明所翳故言疲極憚生歎名爲怖畏
第三不能復進前路猶遠者見思塵沙無明難可卒
斷也然用小乘接之不令頓還本處亦有進義導師
多方便下第二卽以小接也上火宅方便開三乘法
皆有四意此中具足初多方便譬擬宜而作是念下
第二傷其失寶譬知有小無大也次作是念已下第
三化作城譬正用方便是時疲極之衆下第四入城
譬三乘悟入也上兩意如文作化城譬自復爲二先
作化後說化以方便力下正作化告衆言下正說化

上車譬云吾爲汝等造作此車今城是有故須先作
說化城譬擬上勸示證也汝等勿怖莫得退還者勸
轉令前進入城也今是大城乃至隨意所作者是示
轉示城可住也若入是城快得安樂是證轉讚城安
隱也前至寶所亦可得去者三藏教中未論前進一
說云明三乘教時語言若發大乘求佛者亦善如其
不能但作二乘亦好例如勝鬘云三乘初業不愚於
法自知應得作佛但厭憚不堪故取永滅耳若爾成
別教又說云但令入化城竟然後更復前進大品淨
名中悉有其意此卽別接通意耳但於今佛未開顯

法華文句卷七
之前不得彰灼而有此語若論宿世應有是言何者
既知退意王子教化言汝等若畏生死且取涅槃消
息然後更行大道亦可隨意亦如今人欲學大乘而
畏怖生歎欲起退心有人勸言汝且斷煩惱證羅漢
然後更取大道亦可得也今現在一代化道未周不
得忽有此語若開權顯實卽得說之如涅槃中諸取
羅漢者皆是其義也大歡喜卽聞慧未曾有卽煖位
免惡道卽頂位快安隱卽忍位前入城卽見諦位已
度想卽無學位此與火宅適子願勇銳推排出宅同
也生已度想如得盡智安隱想如得無生智又具智

德如已度證斷德如安隱也有人說寶所者三界二
乘若過卽至佛道佛道是寶所大經有三文一至菩
提心二至菩提三至大涅槃門若至菩提心必至菩
提及涅槃引此三文者至菩提心謂至因菩提涅槃
謂至果果中有智斷菩提是智涅槃是斷具說始終
具說智斷故說三文也然過五百有三義一免惡道
二得好路三是寶所菩提心謂度惡道菩提行如平
坦路三得佛道如至寶所下文云今爲汝說實汝所
得非真此明度五百惡道也爲佛一切智當發大精
進謂行菩提好道也汝證一切智十力等佛法謂得

佛道也何故要須度五百二乘度三百菩薩度四百
佛乘度五百也爾時導師知此下第三滅化引至寶
所此中有二一知息已二向寶所既得止息無復疲
倦者譬上涅槃時到衆又清淨免難大機發也卽滅
化城引向寶所譬上正說法華示真實相寶所有二
義若用究竟則以極果爲寶所上文云唯佛與佛乃
能究竟諸法實相也若分入卽以初發心住爲寶所
故上文云無上寶聚不求自得又云得佛法分佛子
所應得者皆已得之大經云須陀洹者八萬劫到到
初發菩提心處也此取鈍根任運用八萬十千等至

若如三藏中四果不經少時皆得入大豈須八萬之
與十千耶云云寶處在近向者大城我所化作卽舉
廢權譬以帖顯實譬也上云如來智慧難信難解是
諸人等應以是法漸入佛慧擬方便中云我令脫苦
縛逮得涅槃者佛以方便力示以三乘教也舊問車
城皆譬無生智車何故無城何故有而車三城一車
動城靜答長者道門外有車有隔故諸子不見可得
假設門外有車車實無也城在迴地不得假設故城
是有也就理教者執三教取理則三教皆得理此卽
有義如城也將理取教理既唯一此教卽無三家之

果卽車義據無也車三城一者諸人同息一處所以
城一也車就三人三人所樂不同故三理教者三家
盡無生不異如城三人正使雖同盡而習氣有盡不
盡有傍得知見有不得者故用此莊嚴盡無生此義
不同如三車三家盡無生智明因盡果亡此處是極
如城靜盡無生智運入無餘如車動也難云今明
約衆生心車城俱有約佛智明亦有亦無權智所明
爲有如城實智所明爲無如車云化城正意爲退
大取小人傍爲發軔學小人上二周正意爲發軔學
小人傍爲退大人也三車通今昔化城正是引教意

未道是化也問化爲三車與化城何異答三車爲說
法輪作譬化城爲神通輪作譬又車約聲作譬諸子
聞而不見城爲色作譬問城與二使云何使能指示
如教詮理城爲息患教動而城靜教卽四諦十二緣
有異城是二智入無餘不異教通因果城車但在果
教通有爲無爲城車但在無爲權智謂車是無名教
施設故實智謂車是有無離文字說解脫故權智照
城爲有引衆生故實智照城是無偏真非實故權智
照車是三逗三緣故實智照車是一俱會一乘故權
智照城爲一是偏真故實智照城爲三如來藏故權

智照城爲靜是灰斷故實智照城爲動滅此化故權
智照車爲運運入無餘故實智照車爲靜不動不出
故作如此釋豈與舊同舊祇在小乘中作義問凡五
處開三顯一爲有何異答通論無異別論有差方便
品約教開三顯一文云如來但以一佛乘故爲衆生
說法無二亦無三也火宅約行開三顯一車是運義
運則譬行文云各乘大車遊於四方嬉戲快樂也信
解中約人開三顯一結會傭作之人卽是長者之兒
我等昔來真是佛子也藥草喻中約差別無差別明
權實不的去取但明衆生不知佛令其知若七種差

別卽知權同依一理無差別卽知實差別無差別無
差別而差別令知此意耳終不說言無一有一此約
自行權實二智隨自意語故佛能知而衆生不知也
亦是通前通後知不知明權實也今化城正約理開
三顯一實所化城皆是小大兩理破除二乘化理顯
於實所真實一理也下去五百領解舉珠爲譬亦是
約理也諸比丘如來下第二合譬先正合後舉譬帖
合而不次第如來亦復如是下初合第五導師譬今
爲汝等下第二合第三多諸人衆譬知諸生死煩惱
惡道險難下第三合第二險惡道譬言長遠二字第四

合第一五百由旬譬應去應度者第五合聰慧明達亦是合第四欲過險道至珍寶處也若衆生但聞下合第二將導譬譬本有三今亦合三若衆生合第一所將入衆也但聞一佛乘者合第二退大接小譬若衆生住於二地下合第三滅化將至寶所譬也第二譬本有退大接小今具合之上退大有三意但聞一佛乘者合上中路懈退無懣意也不欲見佛不欲聞法合上白導師不受誠勸也便作是念者合上不能前進息化意也佛知是心下合上小接退譬本有四今合但三佛知是心合上導師多方便擬宜意也怯

弱下劣者合上此等可愍知有小機也而於中道爲止息故下合第三現作化城衆人入城譬也而於中道說二涅槃者三界惑盡塵沙無明未破於此兩楹判有餘無餘涅槃亦是聲聞緣覺涅槃又分段已盡變易未除二死之間判爲有餘無餘故言中道

云云

若衆生住於二地下合第三將至寶所上文有二今合亦二若衆生住於二地此合知止息已如來爾時卽便爲說下此合將向寶所如彼導師下第二牒譬帖合牒接退譬來合施三牒滅化譬來合顯一如文

云云第二偈頌四十九行半偈頌上上有二今初二

十二行半頌結緣之由次二十七行頌第二正結緣
上由有近遠今初十二行頌上遠由次無量慧世尊
下十行半頌近由上遠由有二今初六行頌大通成
道次六行頌十方梵來請轉法輪上成道中有五今
初三行頌第二將成道前事次過十小劫已下第二
一行頌第三正成道次彼佛十六子下第三二行頌
第五十六子請轉法輪兼頌第四成道已眷屬申供
養略不頌第一佛壽長遠也世尊甚難值下六行頌
十方梵請上有二今初一行頌威光動耀次東方諸
下第二五行頌十方梵尋光而來此中前三行頌東

方次二行摠頌九方也從無量慧世尊下第二十行
半頌近由上有二今初五行頌第一轉二乘法輪次
時十六王子下第二五行半頌第二重請轉大乘法
輪上第一文復三初無量下半行頌第一受請次爲
宣下第二一行半頌第二正轉二乘法輪次宣暢下
第三三行頌第三時衆聞法得道時十六王子下五
行半第二王子重請中有七初二句頌第一王子出
家次皆共請彼下第二一行半頌第二正請轉大乘
次佛知童子下第三二行頌二萬劫中間說方等般
若次說是法華下第四半行正頌第四受請說法華

法華文句卷七
三
次彼佛說經已下第五一行頌第七說經已入定略
不頌第三父王所將八萬求出家第五聞經之衆有
解不解第六說經時節長久也是諸沙彌等下二十
七行頌正結緣上文有二今初八行頌法說次十九
行頌譬說上法說有三今初三行頌第一昔結因緣
次一行頌第二中間相值次四行頌第三今日還說
法華上昔結因緣有四初半行頌佛入定次爲無量
億下第二一行半頌正覆講後一一沙彌下第三一
行頌聞法得益略不頌第四佛起定稱歎也次彼佛
滅度後下第二三行頌中間相遇是十六沙彌下第

三四行頌今日說法華上文二初結會古今有現在
未來今初三行頌結會現在師弟也以是本因緣下
第二一行頌還說法華上文有三今初一句頌第一
時衆清淨以是本因緣今日時衆免難機發也次今
說法華下第二三句頌第二爲說是經也略不頌第
三釋開三意也險惡道下第二十九行頌譬開合初
十一行半頌開譬後七行半頌合譬上開譬爲二今
初三行頌五百由旬譬次八行半頌將導譬上五百
譬有五今初一行頌第二險惡道次無數千萬下第
二半行頌第三多諸人衆次其路甚下第三半行頌

第一五百由旬次時有一導師下第四一句頌第五
一導師強識有下三句頌聰慧明達也不頌第四衆
人皆疲倦下第二有八行半頌第二將導譬上文有
三今亦頌三初二字頌上第一將導從皆疲倦下第
二五行三句三字頌第二衆人懈怠權立化城譬次
導師知已下第三二行半頌第三滅化引至寶所譬
上第二文有二謂初懈怠次接退今初三句三字頌
懈怠次五行頌作化接退上懈怠中有三今略不頌
第一中路也上接退作化文今皆具頌初一行頌第
二傷失大次尋時思下第二二句頌第一作念次化

作大城下第三二行半頌第三作化上文又二今初
一行半頌正作化譬諸舍宅者諸空觀境也園林者
二乘揔持無漏法林也九次第定爲渠流入解爲浴
池重門是三空門又是重空三昧盡無生智爲樓閣
高出也男女是定慧也觀心解者智體周備如城隍
善法圓足如郭之圍繞畢竟空爲舍宅直善能成自
行如男能幹家事慈悲外化如女外適次卽作是化
已下第二一行頌上說化次諸人旣入下第四一行
頌第四入城導師知息已下第三兩行半頌第三滅
化至寶所上文有二今初一句頌第一知息已次集

法華文台卷十一
三十四
衆下第二二行一句頌滅化引向寶所也我亦復如是下第二七行半頌第二合二譬初半行頌合第一五百譬次七行頌合第二將導譬上合五百又有四今半行惣頌而已也見諸求道者兩行頌合懈退譬上頌開譬不頌中路今一行合中路懈退次一行頌合接退作化也既知到涅槃下第二五行頌第二合滅化至寶所上文合二今頌亦二初半行頌第一知息已爾乃集大衆下第二三行半頌第二合滅化引向寶所也合息化偈中卽有三德祕密藏義汝證一切智卽是般若具三十二相卽是法身乃是真實滅

卽是解脫三法不縱不橫卽是見佛性也諸佛之導師下一行頌帖合也
釋五百弟子受記品

此品具記千二而標五百者何五百得記名同五百口陳領解故以標品耳此品是因緣說中第二段就得記有二一千二百二千千二復二一授滿願二授千二百滿願復二一序默領解二如來述記先敘其得解歡喜次敘其默念領解歡喜復二一敘其得解之由二敘其得解歡喜得解之由有四初聞法譬二周開三顯一二授身子等五大弟子記三復聞宿

法華文句卷十一
世結緣之事四復聞諸佛如來三達無礙觀彼久遠
猶若今日卽是大自然在神通之力斥異二乘止齊八
萬也若從佛聞是智慧卽領方便火宅中顯實方便
隨宜所說卽領兩處開權諸大弟子卽領開權授菩
提記卽領顯實宿世因緣卽領顯實神通之力卽領
開權也得未曾有下敘其得解歡喜先明內解歡喜
次明外形恭敬由昔未聞開權顯實而今得聞故言
得未曾有除涅槃愛斷破別惑故言心淨開佛知見
是故踊躍得解由佛故起恭敬也若約本迹者慶諸
實行耳而作是念下正明默念領解初明默念領解

次明默求發迹請記上二周得悟皆發言領解此何
默念上爲下根未悟事須彰言勸動今下根已悟無
所勸動故默念不言又上來但領解不求發迹言則
不嫌今則亦解亦發亦解故念避物譏嫌故默默念
允宜也又默念領解是大領解如淨名默然是真入
不二法門也又權實不可思議非言非念而言而念
非言而言故上來口陳領解亦非念而念今則默念
領解上來何意不求發迹爲下根未悟是故不求發
迹今下根已解權化事足也若下根發迹則知中上
亦權若約上中則於下不便故也世尊甚奇特所爲

法華文句卷下
三十一
希有者領實智也隨順世間若干種性而爲說法卽
領權智也是七種方便之根性也此領方便品中開
權顯實意也拔出衆生處處貪著者卽是領火宅中
開權顯實也我等於佛功德言不能宣者領上藥草
喻中如來有無量功德汝等所不能及也旣云言不
能宣亦是念所不及也唯佛能知下卽是默念求發
迹請記也我等者通念請發諸人迹也深心是本今
現作是迹本願者大慈誓願也大慈下化故我爲誓
上求作佛故我有願請上求卽是求記請說下化卽
求發迹又從深心故明其三世助佛宣化從本願故

卽與授記也佛告下第二佛述而記之有長行偈頌
長行有二一述本迹二與授記初有三一就釋迦世
行因發迹二約過去佛世行因顯本三就三世佛所
修因行滿就釋迦佛所行因發迹復三一舉示其人
二揔標本迹章三別釋本迹卽標言汝等見不有二
意一見其迹爲小不二見其本功德不衆人但見迹
爲聲聞而不能知本是菩薩故云見不我常稱其下
是標其迹迹爲說法人中最爲第一若非法身妙本
無以垂於第一勝迹昔來但言於迹中說法第一今
則不爾於無上法久得第一此舉迹以顯本也亦常

法華經卷之二
三
歎其下標其本地福慧萬行法門故云種種也本地
既有種種法門亦復何但迹爲二乘耶此舉本以明
迹也精勤護持下別釋也助宣我法者卽是迹中助
宣半滿之法迹爲下根聲聞卽是護持助宣酪法迹
在方等示受彈訶卽是護持助宣生蘇法迹領般若
卽是護持助宣熟蘇法迹在法華得悟卽是護持助
宣醍醐法上揔本中云我常稱歎種種功德者卽此
意也具足權實功德而迹起五味助佛調熟實行衆
生豈非精勤助宣之意也別釋本迹功德能於四衆
示教者分別半字教也具足解釋者助宣滿字般若

教也而大饒益者助佛饒益半滿之衆生也同梵行
者是迹所化半滿弟子也自捨如來下別述本地功
德也自捨者降妙覺已來也無能知者七種方便也
汝等勿謂助宣我法下第二就過去佛世顯其本行
非直止於我所助宣半滿之法久遠佛所亦復助宣
半滿之法取今日助宣爲發迹取過去助宣爲顯本
顯本有二一遠本二近本遠本冥邈爲信良難故略
而不述但舉九十億近本有宿命智能知近本故舉
近以證遠就九十億文具明助佛宣揚五味之教調
熟衆生護持助宣卽擬助宣半字酪味法佛之正法

卽擬助宣方等生蘇味法又於空法明了者卽擬助
宣熟蘇味法亦如今佛轉教說於般若明六波羅蜜
互相收攝旋轉無礙九十億佛所亦助宣揚如今無
異彼佛世人咸皆謂之實是聲聞于時旣未發迹但
謂被加命轉般若不言是大菩薩也化無量衆生令
立三菩提者卽是助宣醍醐味法在文可解云亦
於七佛下第三約三世佛所修因如文此亦例前助
宣半滿五味之法利益大小也

妙法蓮華經文句卷第七下

妙法蓮華經文句卷第八上

天台 智者 大師說

漸漸具足菩薩下第二授記文爲七一明因圓二過
無量下明果滿三明國土廣淨四明國劫名字五明
佛壽量六明法住大久七明佛滅後供養舍利就第
三國廣淨中復五一明國大嚴淨地平如掌者經直
言如掌不言手掌手掌不平則非所引海底有石名
掌此石無有一微塵許不平當是類如海掌耳又賢
劫經正明如佛手掌非引人掌也二明純是善道三
明人天福慧具足月藏第九法食喜食禪食經文摠

法華文句卷八
言法喜禪悅別分應有三種差別四明菩薩聲聞衆
數甚多五總結也月藏第五云不殺得十功德一於
一切衆生得無所畏乃至第十命終生善道後作佛
國無害仗之具國人長壽不盜十功德一果報具足
而大爲事決斷無有難礙乃至第十死生善道後作
佛國華寶莊嚴充滿不淫十功德一諸根律儀爲事
決斷乃至死生善道後作佛國無女人不妄語十功
德一衆生信其言乃至死生善道後作佛時國無臭
穢常滿寶華不兩舌十功德一身不可壞乃至死生
善道後作佛國魔不能壞眷屬不惡口得十功德一

柔輒語乃至死生善道作佛國法聲充滿不綺語十
功德一天人愛敬乃至死生善道作佛國衆生強記
不忘不貪十功德一身根不缺乃至死生善道作佛
國無魔外道不瞋十功德一離一切瞋乃至死生善
道作佛國人得三昧不邪見十功德一心性柔善乃
至死生善道作佛國人正信偈有二十一行半頌上
發迹授記初有十四行頌發迹次七行半頌授記初
復二前七行摠發諸聲聞迹頌上我等之意也後七
行頌上發滿願迹總中有五初一行摠標佛子爲行
難思已得垂迹之法次知衆樂小法下第二一行明

法華文句卷八
垂迹之由次以無數方便下第三二行明垂迹利益
次內祕下第四二行明內懷大道外現小失次若我
具足下第五一行指略抑廣小欲者示求小乘也懈
怠示退大乘也非但示爲聲聞亦作外道及三毒凡
夫也身子示瞋難陀示貪調達示癡云今此富下
第二七行頌發滿願迹本上文有三今略頌二初五
行頌顯過去本後未來亦供養下第二二行頌三世
中佛所行因略不頌七佛及現佛也供養諸如來下
七行半頌授記上文有七今頌其四初半行頌因圓
次半行頌果滿其國名淨下三句超頌國劫名號菩

薩衆甚多下五行三句頌國土廣淨略不頌壽命法
住滅後起塔也第二授千二百記一念請二與記三
領解請記如文授記文有長行偈頌長行有三一摠
許千二百記二別授陳如陳如最初悟道居首上座
故別授記三別授記五百五百名同須別與記問但
見五百得記不見千二百答此五百卽千二百數頌
中末後一行半摠受七百故是千二百也又持品云
我先摠記一切聲聞皆已授記卽指今一行半非是
止授七百聲聞也偈頌有十一行爲二初九行半頌
記陳如及與五百後一行半摠授一切聲聞記五百

領解文有長行偈頌長行先經家敘其歡喜次自陳
領解經家先慶今得解歡喜次愧昔不解故自責慶
中先明內心慶喜後明外形恭敬也悔過自責者卽
是明其愧昔不解也世尊我等下第二自陳領解有
二一法說二譬說法說中初悔得少爲足次責根鈍
難悟從世尊乃至滅度是悔責昔迷得小爲足不知
求大從今乃知之是責根鈍始悟不早知之今知小
非究竟大爲真實也譬中二初略次正舉譬如無智
者略舉譬況所以者何下釋無智意也譬說有二一
者醉酒譬譬法說自悔得少爲足不知求大領前法

譬宿世中施權意二者親友覺悟譬譬法說自責根
鈍難悟今乃知之領前法譬宿世中顯實就初復三
意一者繫珠譬領上王子結緣二者醉卧不覺譬領
上遇其退大三者起已遊行譬領上接之以小譬如
有人者卽二乘人也親友者昔日第十六王子也家
卽大乘教爲家也醉酒而卧者當于爾時大機暫發
無明暫伏以得聞經內心微解以無明重故還復迷
失醉有二義一重醉都不覺知二輕醉微覺尋忘亦
名不覺雖有二義終成繫珠如毒鼓耳官事當行者
明王子餘處機興逗緣往應故云當行弘法化他此

非私務故云官事無價寶珠者一乘實相真如智寶也繫其衣裏者慚愧忍辱能遮瞋恚及防外惡卽是外衣信樂之心內裏善根卽是內衣于時聞法微信樂欲卽了因智願種子也第二醉卧不覺知者無明心重尋復不憶此領中間懈退不受大法也第三起已遊行他國者領上中間接之以小受三乘化也善根欲發厭苦求樂故云起已遊行無明覆解不知向本求大乘衣食故言向他國求於小乘衣食若魔佛相望生死魔界爲他國佛法大小皆爲本國就小大相望小乘未免生死猶是他國大乘永免生死乃爲

本土究竟還源也明背大乘國往小乘土不知從珠取給而備作自資獲一日價得少爲足也於後會遇下第二親友發覺譬領上以是本因緣今說法華等賜大車也此爲三先呵責二示珠三勸買呵責譬上動執生疑示珠譬宿世因緣勸買譬得記作佛三周皆有此三意法說中我令脫苦縛卽是呵責五佛章卽是開示身子得記卽是勸買譬說中我先不言皆爲菩提卽是呵責三車一車卽是示珠中根得記卽是勸買下根宿世因緣汝等善聽卽是呵責覆講結緣還爲說大卽是示珠下根得記卽是勸買繫珠中

法華文句卷八
五
三意望三周者始在佛樹以大擬卽是繫珠無機息
化卽是醉卧尋施方便卽是起行譬喻中二萬億佛
所卽是繫珠遣傍人追悶絕不受卽是醉卧三車引
得卽是起行因緣中大通智勝佛所卽是繫珠中路
懈退卽是醉卧接之以小卽是起行此等皆名領權
也某年日月者指大通佛所也佛亦如是下第二合
譬譬本有二今各有三意從教化我等下合初一繫
珠而尋廢忘合初二醉不覺知旣得羅漢下合初三
起已遊行一切智願下合後親友覺示譬上有三今
亦三從智願不失者是合後一呵責從我久令汝下

合後二示珠從我今乃知下合後三勸賀所須也第
二偈頌有十二行半爲二初一行半頌內心得解又
二初一行頌慶喜次半行頌悔責也次於無量佛寶
下第二有十一行頌自陳領解上文有二今初半行
頌悔責得少爲足略不頌難悟今乃知之如無智愚
人半行頌略舉譬便自以爲足頌釋無智意次十行
頌譬說開合初六行頌開後四行頌合上開有二今
初四行頌捨寶不知後二行頌親友覺悟餘文易見
釋授學無學人記品
研真斷惑名爲學真窮惑盡名無學研修真理慕求

勝見名之爲學學位在三果四向真無漏慧也阿羅漢果研理已窮勝見已極無所復學故名無學約教釋品者析法研真名之爲學惑盡真窮名爲無學三藏意也體法研真名之爲學無真無惑名爲無學通意也自淺之深名之爲學通別惑盡權實理窮名爲無學此別意也研如來藏有學無學法性實相非學非無學而學而無學云云是二千人或是學或是無學人同是一流一時受記同一名號故別爲一品也此品是授記文中第二段也就此文爲二一請記二授記請中復二一者二人請二者二千人請二人請

記復有二一默念二者發言請記發言請記復二一者引例亦應有分二者引望二人最親時衆所望羅雲是佛子俗中親重阿難持佛法藏道中親勝勝重兩人不蒙別記則衆望不足也問若重若勝應同上流何意在此若如列衆二人在上數中獲記何意居下答揔與千二百記二人已同上流今更索別記耳阿難是學人羅雲弟子位故入學無學章耳二千請記但有默念引例二意同故言如阿難願耳無發言者無重無勝等事也授記復二一先記二人後記二千阿難記中復五一長行二偈頌三八千菩薩生疑

四如來發迹釋疑五阿難顯本述歎疑者通疑聲聞
今日發心卽蒙佛記國淨若此昔方等中記諸菩薩
無量劫行乃得佛記佛卽發迹釋疑昔日與我同發
大心卽是同學由我精進前超得佛由彼多聞猶故
持經迹爲侍者本地如此今授妙記何足可疑餘記
悉如文

○釋法師品

此品五種法師一受持二讀三誦四解說五書寫大
論明六種法師信力故受念力故持看文爲讀不忘
爲誦宣傳爲說聖人經書難解須解釋六種法師今

經合受持爲一合解說爲一開讀誦爲二足書寫爲
五別論四人是自行一人是化他大經分九品前四
人無解是弟子位後五人有解是師位通論若自軌
五法則自行之法師若教他五法則化他之法師自
軌故通稱弟子化他故通稱法師今從通義故名法
師品若作減數說者束五爲四卽四安樂行如後說
若束四爲三者受持是意業讀誦說是口業書寫是
身業別論口業是化他身意是自行通論三業自軌
卽是自行之法師三業教詔卽化他之法師故言法
師品又是三門行此五法以自熏修卽福德門弘宣

五法廣利益者卽化他門自修益彼皆順佛教卽報恩門別論者自修報恩名自行益彼卽化他通論自軌軌他皆稱法師故言法師品也又讀誦書寫是外行卽如來衣受持是內行卽如來座解說益他是如來室如來室別論是匠他衣座別論是自匠通論不爾慈悲覆物惠利歸己名之如室遮彼惡障己醜名之爲衣安心於空方能安他安己名之爲座此則自軌三法亦名法師利物必以慈悲入室爲首涉有以忍辱爲基濟他以亡我爲本能行三法大教宣通卽世間依止故名法師又束爲二謂自行化他此

易解不復記又束爲一謂如來行具一切行悲拔一切苦謂四趣三界二乘菩薩等苦慈與一切樂謂人天涅槃常住等樂柔和衣障一切醜謂四住無知無明等醜空座亡一切相謂有相無相非有相非無相此則通意別意者慈悲生一切善柔和遮一切惡空座蕩一切相又慈忍立一切福德空座成一切智慧智慧是目所謂五眼福德是足所謂六度又慈悲勝一切聲聞緣覺柔和勝一切凡夫外道空座勝析體偏等菩薩故淨名云譬如勝怨乃可爲勇又慈悲破天魔柔和破陰魔空破煩惱魔歿魔大品云化一切

衆生觀一切空魔不得便云云又慈忍故能問空座故
能答具二莊嚴又觀空故能問慈忍故能答慈忍故
能種能立能資空慧故能耘能破能導又慈悲故何
所隔柔和故何所礙空座故何所諍出三諦故名爲
勝幢包含普攝名摩訶衍是如來行故稱三昧王經
言一切善法慈爲根本忍辱第一道無相最上若論
圓行說不可盡云云問何故約三法明法師答事一
往論必須登堂整服坐座乃可敷弘故約三耳又事
理合論夫迷惑不出三種一約苦果起惑二約結業
起惑三約諦理起惑故用三門而示導之又約理迷

真故墮苦故用慈悲門迷俗故沈空受樂故用和忍
門迷中故成智障故用空門云云法者軌則也師者
訓匠也法雖可軌體不自弘通之在人五種通經皆
得稱師舉法成其自行皆以妙法爲師師於妙法自
行成就故言法師又五種人能以妙法訓匠於他故
舉法目師故稱法師品也若自軌法若法匠他俱名
法師者則因緣釋品也凡多種解皆約圓教法門而
釋品也前三周是迹門正說領解受記竟此下五品
是迹門流通非止蔭益當時復欲津洽來世故有五
品流通法師寶塔兩品明弘經功深福重流通未聞

利益巨大達多一品引往弘經彼我兼益以證功德
深重持品八萬大士忍力成者此土弘經新得記者
他土弘經安樂行一品舊云接退流通或當如此未
必全然外凡初心欣斯勝福見聲聞畏憚聞菩薩擯
辱顧已力弱無益自他便生退沒佛爲此人說安樂
行依之法弘不慮危苦又法師品釋尊自說弘經功
福命覓流通寶塔品多寶分身且證且助勸覓流通
法師品初長行偈頌歎美五種法師能持法人後長
行偈頌歎美所持之法又示通經方軌初復二一就
稟道弟子門功深福重二授道師門功深福重弟子

門又二一佛世弟子二滅後弟子初因藥王告八萬
者因者憑寄也欲以妙法憑寄藥王使其領受告語
八萬皆流通也指人問其見不者的示持經得福之
人也佛世又二一從告藥王下揀出人類二從咸於
佛前下揀出得記之緣若於佛前當機妙悟者是多
聞深解二千五百者是也皆已現前與揔別記竟今
所揀類或是八部之類或是四衆三乘之類結法華
座席咸於佛前者明其時節值佛在座也一句一偈
者聞法極少也乃至一念者時節最促也皆與記當
得菩提者明其聞極少時極促隨喜之功遂得佛果

何况具足得聞盡形受持五種流通三業供養云云
聞一句一偈者聞少解淺之類今皆與記少者尚記
况復多深以少况多普廣若此下周既爾中上亦然
可以意知不俟更說見實三昧經別與四天王記同
名火持三十三天同名因陀羅幢王拘翼同名無著
燄天同名淨智梵率同名釋法王上兩天亦通與記
不顯別名梵天名大智力此是聞多解深之類今與
聞少解淺之類耳舊云支佛菩薩無受記此文三乘
皆記不須疑也一偈一句者增一集云隨取經中要
偈如四諦之流者是也十住毗婆沙云惡賤名狀不

求名無欲心無垢名解脫捨權名涅槃惡賤於集不
求於苦無垢是道捨權是滅又云佛語滿宿我有四
句所謂四諦四念處等是也觀心者以一一句以一
一偈無句無偈而不一者云云若取迹門中要句開
示悟入乘是寶乘遊於四方四安樂行勸發四意等
是也一念隨喜者自未有行但隨喜法及人功報尚
多况行到耶隨喜喜心有二若聞開權顯實即於一
念心中深解非權非實之理信佛知見又能雙解權
實事理圓融雖具煩惱性能知如來秘密之藏此即
豎論隨喜又若聞開權顯實之意即於一心廣解一

切心及一切法皆是佛法無有障礙若欲分別辯說無窮月四月至歲旋轉不盡雖未得真隨喜心能如此解法既如此人亦如是此約橫論隨喜卽橫而豎卽豎而橫故大經云寧願少聞多解義味卽此意也後當更說從告藥王又如來滅後下明佛滅後弟子亦二先出弟子類略舉於人例上可知次言我亦與記功報如前解也若復有人下第二師門有長行偈頌長行有二先別後摠別者人譚下上時譚現未摠者無論下上及以現未通明逆之得罪順之得福也就別復二一明現世二明來世就現世復二先明下

品師後明上品師下品師爲二初明師相次明師功報師相者卽是五種法師十種供養也次藥王當知是諸人等已曾供養下明下品功報也曾供養者先因深也愍衆生故生此人間明現功大也若有人問下明未來報重也從何況盡能受持者明上品師亦二先況出上品師相次藥王當知是人自捨清淨業報此明上品功報也若是善男子於我滅後能竊爲一人下明滅後師亦有下上下下品亦二先出下品人者卽是但豎得其意有慧無聞止堪竊說未可處衆故是下品之師竊爲一人說一句者雖得一句之解

既不廣聞多學異義不可衆中而說一切問難有所不通便令正理不得宣弘如釋論明有慧無聞譬如小雨無雷若欲申此一句正言且當竊說耳當知是人則如來使者明其功報經是如智所說說於如理今日行人乘此如教宣於如理卽是如來所使也行如來事者如智照如理爲事今日行人依如教行如理卽是行如來事也一如智一如理化衆生爲事今日行人能有大悲以此經中真如之理爲衆生說令得利益亦名行如來事也觀心解如來使者智心觀境境卽真如境來發智智爲如所使也如來所遣者

觀智從如中來也行如來事者歷一切法無不真如真如卽佛事也何況於大衆中下明上品人略不格量功報此意可知也若有惡人下第二摠明五種法師逆者得罪順者得福也此中罪福不論福田濃瘠但約初後心明其輕重初心學人旣具煩惱若加障礙則所學事廢故獲罪多佛則平等惡不干偏豈能障礙故言罪輕供養亦爾此人有待若得供養所修事成故施其福勝佛則無待衆事滿足雖復獻供於佛無益故言報劣譬如王子在難供奉所須其功甚大若辱王種獲罪不輕故罪福俱重若獻大王衣食

爲要事微汝欲侵陵不能致損故罪福俱薄藥王下
明讀誦如佛莊嚴卽是順之得福佛以定慧莊嚴此
人能修定慧故也爲如來肩荷者在背爲荷在肩爲
檐修非權非實法身之體卽是爲如來荷能權能實
二智之用卽是爲如來檐隨所向方應向禮者上明
以法爲師今明堪爲物師此人有趣向悉與實相相
應皆可敬順順卽是向敬卽是禮敬而順之及興供
養等云偈有十六行爲三初二偈不頌長行別獎
勸自行利他次十三行頌上師門別通後一行歎經
頌別揔中又二初七行頌別後六行頌揔上別門有

現未今初四行頌現後三行頌未上現未一師各有
上下今初若有能下一行頌下品上半出法師當知
佛所下半出功報也諸有能受持此下三行頌現在
上品師初半行出上品師捨於清淨土下第二二行
半頌功報也吾滅後下此三行頌未來初二行超頌
況出上品爲二今初吾滅後下半行頌法師長行中
本闕功報今偈則有當合掌下第二一行半明功報
也若能於後世下第二一行追頌下品師初半頌出
人次我遣在下第二半頌功報也若於一劫下第二
六行揔頌上揔門上揔門亦二初二行頌逆者得罪

有人求佛道下第二四行頌順之得福也藥王今告
汝下第三一行歎經尊妙從爾時佛復告下第二歎
所持法及弘經方法所持法是自軌法弘經法是軌
他法有長行偈頌長行初歎經法次方軌歎爲五一
約法歎亦格量歎二約人歎三約處歎四約因歎五
約果歎法妙故人貴人貴故處尊處尊因圓因圓果
極也初歎法者已今當說此經爲最有師解已般
若當是涅槃法華之前小大相隔法華已後已得會
同此經正是會三之始歸一之初故言第一經歎法
華在已今當外此師闕一節云今初言已者大品

已上漸頓諸說也今者同一座席謂無量義經也當
者謂涅槃也大品等漸頓皆帶方便取信爲易今無
量義一生無量無量未還一是亦易信今法華論法
一切差別融通歸一法論人則師弟本迹俱皆久遠
二門悉與昔反難信難解當鋒難事法華已說涅槃
在後則易可信也祕要之藏者隱而不說爲祕揔一
切爲要真如實相包蘊爲藏不可分布者法妙難信
深智可授無智益罪故不可妄說也從昔已來未曾
顯說者於三藏中不說二乘作佛亦不明師弟本迹
方等般若雖說實相之藏亦未說五乘作佛亦未發

法華文句卷八上
迹顯本頓漸諸經皆未融會故名爲祕此經具說昔
所祕法卽是開祕密藏亦卽是祕密藏如此祕藏未
曾顯說如來在世猶多怨嫉者四十餘年不得卽說
今雖欲說而五千尋卽退座佛世尚爾何況未來理
在難化也如來滅後其能書持下第二約人歎也此
法在人則人尊貴如來衣覆者卽是修學大忍爲衣
也上文云如來莊嚴也佛護念者實相爲佛實智爲
子尊崇實相發生實智卽爲諸佛所護念也四信爲
信力四弘爲願力大智爲善根力也信則信理理卽
法身志願是立行行卽解脫善根根固難動此卽般

若當知三力卽是三德祕密之藏初心棲此與佛不
殊故名與如來共宿也又信力修畢竟空如來智如
來棲畢竟空爲舍此人信力亦學畢竟空故與如來
共宿手摩頭者此人以願力善力自行權實以爲機
感機感名頭如來以化他權實二智名手開發前人
自行權實之頭感應道交故言摩頭摩頭卽授記也
在在處處下第三約處歎此法在處卽處貴夫佛生
處得道轉法輪入涅槃等處法王所遊皆應起塔此
經是法身生處得道之場法輪正體大涅槃窟此經
所在須塔供養不復安舍利者釋論云碎骨是生身

舍利經卷是法身舍利此經是法身舍利不須更安
生身舍利生法二身各有全碎皆可解云若出家
下第四舉因歎若未善行菩薩道者稟前三教卽是
碎散法身舍利未能巧度若入圓教卽是全身舍利
則巧度巧度爲善行也其有衆生下第五舉果歎文
爲五一明近果二開譬三合譬四釋近五揀非今初
明近果當知必得近三菩提果者安樂行中名爲近
處此菩提果佛眼佛智知見處爲體則有二種一者
初心菩提二者後心菩提今言近者正近初住菩提
又望圓果而修圓因得似解者名之爲近前約因歎

修通別因卽是未善去圓果遠也若修圓因卽是善
行去圓果近也今以圓如實智爲因還以爲果道前
真如卽是正因道中真如卽爲緣因亦名了因道後
真如卽是圓果故普賢觀云大乘因者卽是實相大
乘果者亦是實相釋論云初觀實相名因觀竟名果
就理而論真如實相無當因果亦非前後若約衆生
修行則有前後及以因果也譬如有人下第二開譬
爲二釋一約觀門二約教門觀門者衆生之心具諸
煩惱名高原修習觀智名穿掘方證理味如得清水
依通觀乾慧地如乾土性地爲溼土泥見諦爲得清

水別觀從假入空但見空不見不空斷四住如鑿乾
土去水尚遠從空出假先知非假今知非空因是二
觀得入中道能伏無明轉見溼土去水則近也圓觀
中道非空非假而照空假如漸至溼泥四住已盡無
明已伏已得中道相似圓解故言如泥若入初住發
真中解卽破無明如泥澄清得見中道如見清水法
華論云佛性水當知次第約教門者土譬經教水
喻中道教詮中道如土含水三藏教門未詮中道猶
如乾土方等般若帶於方便說中道義如見溼土法
華教正直顯露說無上道如見泥因法華教生聞思

修卽悟中道真見佛性所發真慧不復依文如獲清
水無復土相故華嚴云十住菩薩所有慧身不由他
悟也有人言初教如高原乾土大品如溼土法華如
泥佛果如水有人言維摩思益如乾土無量義如溼
土法華如泥佛果如水有人言大品如乾土無量義
如溼土法華如泥佛果如水三家皆五時之說生師
云受持法華求佛道欲得如渴三乘於一乘難信於
法華求解如高原受持讀誦爲穿未能如聞而解爲
未聞如乾土能解爲至泥注家同有人云此一解去
佛遠一解去佛近初三師明諸教去佛遠法華去佛

近後二解但於法華中論遠近尋經應二義一舉餘經對法華明遠近二就法華論遠近諸師失經旨問餘經何故去佛遠若未開權求佛人未決法華唯一無三永出退心故去佛近文云決了聲聞法問般若云何去佛遠若未開權邊則遠始行菩薩不覺般若密化付財則於其是遠夫般若實慧方便是三世佛法身父母求佛者如老病人兩健扶之徧能遠去當知般若最勝法華開權不異般若顯實非般若外別有法華法華般若異名耳既是諸師異釋故錄之耳次菩薩亦如是下第三合譬於法華中獲聞思修卽

是圓觀三慧方能近果非乾溼等教中聞思修也所以者何下第四釋得近意也一切菩薩者明諸權因也三菩提者明一切權果也權因權果皆攝屬此經如乾溼等土悉依於水故言攝屬也開方便門示真實相者光宅云昔鹿苑機雜盛說三藏未明一理爾時以權隱實一理爲權教所閉今王城赴大機顯於真實真實既顯則廢除昔教昔教被廢故方便門開一理旣彰真實相顯也私謂此解乃是破方便非開方便也河西道朗云直詔三爲方便卽是開方便門昔不言三是方便故方便門閉今詔三爲方便卽示

一爲真實也私謂此釋符文有人解開教身兩方便
示教身兩真實三世佛唯有形聲權實約此開示則
十二八萬煥然了矣私謂前二師約教開示後人加
之以身此竊龍印之義而爲已釋還是破方便意非
開義也問方便當體是門爲通實相故爲門私荅具
二義爲實相門可解當體是門如華嚴尋善知識得
種種法門筭砂觀海等此二門各有開閉昔不言三
是方便故其門掩今說三是方便故其明開昔不說
一是真實實門掩今說一是真實故實門開二者此
方便復通實相故三乘方便爲一乘門實相亦二義

一當體虛通故名之爲門如淨名不二門華嚴法界
門等二能通方便作門劉虬云通物之功乃由乎一
故一爲方便之門汲引之效頗賴於三故三爲真實
之相言非三則方便之門得開語唯一則真實之相
可示有人云具論有三義一以三爲方便一爲真實
二三一皆方便非三非一爲真實三三一爲二非三
非一爲不二二不二皆權非二非不二爲實此三章
得爲門如以三爲一門此以權通實若以一爲三門
以實起權乃至二不二亦爾互得爲門亦互得爲相
但不得互爲權實耳私謂以三爲一門者三乘通實

相不若不通則非門須開三始得是門若開三者非
復三也云何以三爲實相門又三非佛因那得是實
相門破此一義餘二例去云云問方便真實互得爲
門亦得方便爲方便門實相爲實相門不此有四句
二如前三實相爲實相門四方便爲方便門如名爲
義門義爲名門由方便名顯方便義故名爲義門由
方便義應方便名故義爲名門實相亦爾中論序云
實非名不悟故寄中以宣之卽其事也問得以三顯
三以一顯一不此亦四句二如前以三顯三者言昔
二異今一此三在一外今一異昔三此一在三外故

一非三一三非一三悉是執見破此病故於一佛乘
分別說三故三是一三汝等所行是菩薩道故一是
三一三一旣不相異因緣之義以因緣三一顯自性
三一亦以自性三一顯因緣三一故云以三顯一以
一顯三有人引十五處明門方便品有二譬喻品有
六信解品有三化城品有二法師品有一觀音品有
一方便二者智慧門權智爲實智門生師云言教爲
門言教說實智故言教是實智門法華論同也次云
以種種法門宣示佛道此用大乘教爲門譬喻六者
一其家廣大唯有一門還以大乘教爲門二云所燒

法華文台卷八
之門此約三界限域爲門如詔家爲門三唯有一門而復狹小還是大乘教爲門四三車在門外還以三界爲門五以佛教門出三界苦此用小教爲門六在門外立依大乘用二歟限域爲門小乘亦出一切煩惱外正習已盡名在門外立也信解品住立門側大乘理教爲門二云猶在門外亦如前三云長者門內如前化城請開甘露門亦大小教門重門高樓閣亦用小乘三空門方便門如前釋觀音亦以大教爲門今釋開方便門者昔所不說今皆說之昔說一切世間治生產業何曾是於方便今皆開之卽是實相不

相違背昔說小乘方便若小乘果小乘果尚非實相門況小方便而當是門今皆開之卽是實相汝等所行是菩薩道決了聲聞法是諸經之王昔說二爲方便門者今皆開之卽是實相寧復是門咸令衆生開示悟入佛之知見一色一香無非佛法若門若非門悉皆開之示真實相顯佛性水若不開者則深固幽遠無人能到而今開之卽得見水無乾土也又作三慧釋一切皆屬此經卽圓聞慧也此經開方便卽圓思慧也示真實相者卽圓修慧也此三幽遠佛今開示卽得覩真藥王若有菩薩聞下第五揀非若菩薩

聞此說而驚疑聲聞上慢悉是乾土尚非溼土況見
水耶從若有善男子善女人如來滅後下第二略示
弘經方法又爲二一示方法二明利益方法爲三一
標章門二解釋三勸修修如來室是大慈悲若就同
體卽法身也若被衆生卽是解脫能令衆生會於同
體卽是般若修如來衣者若就所覆卽法身也若就
能覆嚴身卽寂滅忍也若就和光利物卽解脫也若
就能坐卽般若也若就所坐卽法身也身座冥稱卽
解脫也又大慈安樂卽資成柔和伏嗔斷惑卽觀照
坐座卽法身安樂行中還廣此三法上文如來莊嚴

卽衣也上云如來肩所荷者卽此座也檐者卽檐運
是入室也我於餘國下第二舉五利益勸獎流通一
遷化人二遷化四衆三遷八部四見佛身五與揔持
也若初心未淳止可遷化人未可遣化四衆八部若
見天龍倚此自高妨損其道故不可令見也若心無
倚著則堪見佛況復天龍況得揔持自證利益耶偈
有十八行半爲三初一行揔勸不頌長行次十六行
半頌上長行後一行結勸上約果歎文有五今初一
行半頌開譬次藥王汝當知第二二行半頌合譬略
不頌餘三近果釋揀非等也上通經方軌中有二方

軌利益今十二行半頌初三行半頌方軌中有三今亦頌三意也我千萬億下次九行頌利益初一行摠明如來以五事利益之意正由應身徧滿十方能爲五事守護行人若我滅後下一行半頌第二遣四衆引導下一行半頌第一遣化人若說法之人下二行頌第五令得摠持若人具是德下一行頌第四令得見佛若人在空閑下二行頌第三遣八部云云

妙法蓮華經文句卷第八上

妙法蓮華經文句卷第八下

天台 智者 大師說

釋見寶塔品

梵言塔婆或偷婆此翻方墳亦言靈廟又言支提無骨身者也此塔既有全身不散則不稱支提阿含明四支徵知倚謂生處得道轉法輪入滅四處起塔今之寶塔是先佛入滅支徵經云佛三種身從此經生諸佛於此而坐道場諸佛於此而轉法輪諸佛於此而般涅槃祇此法華卽是三世諸佛之四支徵先佛已居今佛並坐當佛亦然此塔出來明顯此事四衆

法華文句卷之二
皆觀故言見寶塔品瓔珞經善吉問生身全身碎身
功德等耶佛言不等色身言教化訓三業具足清淨
衆生得至道場全碎舍利正可威神光明供養得福
是故不等又問頂王如來十二那術劫說法教化舍
利亦爾此應是等佛言皆頂王如來神力所作耳彼
經格全碎舍利皆由生身佛力今經格生身全碎舍
利法身偏圓舍利皆從經出顯此經功德弘持力大
從地涌來證明此事四衆皆觀故言見寶塔品北地
師云佛爲身子說經時寶塔已現爲作證明若說經
竟來證何等經家作次第安置三周後耳此乃人情

則不可信今依薩雲分陀利經云佛說法華無央數
偈時有七寶塔從地涌出中有金牀牀上有佛字袍
休蘭羅漢言大寶歎釋尊言我故來供養願坐我金
牀更爲我說薩雲分陀利依此經證卽是說三周後
更請壽量明文聖說而不肯用人之穿鑿那可承耶
此塔正爲證前請後從地涌出四衆皆觀故言見寶
塔品地師說多寶是法身佛釋論說多寶誓願化身
來證經此文亦爾師言法身無來無出報身巍巍堂
堂應身普應一切若卽此謂是三佛者未盡其體也
祇是表示而已多寶表法佛釋尊表報佛分身表應

佛三佛雖三而不一異應作如此說如此信解也此
四番卽四悉檀解見寶塔云塔出爲兩一發音聲
以證前開塔以起後證前者證三周說法皆是真實
若略言真實者皆與實相相應也若廣言真實者離
四句絕百非也若處中說者八不名真實塔從地涌
示不滅分座共坐示不生入塔示不常現塔示不斷
分身示不一全身示不異多寶讓座示不來釋迦坐
半座示不出入不顯然故是真實又證迹門流通持
經功深弘宣力大皆真實也平等大慧者與般若云
何釋論七十九云般若是三世諸佛妙法如一城門

四方皆入當知般若亦稱妙法此經稱平等大慧二
文相指其意可知起後者若欲開塔須集分身明玄
付囑聲徹下方召本弟子論於壽量久遠之塔從地
涌出開自在神通之力顯過去世益物也發大音聲
開師子奮迅之力顯現在十方開權顯實也有大誓
願未來諸佛若說此經我之寶塔皆到其所爲作證
明開大勢威猛之力顯未來常住不滅也又塔在空
中亦證前起後七方便人藏理未開無明所隱如塔
在地聞三周開三顯實開佛知見顯出法身如塔涌
空此卽證前修得法身久已明著如塔在空無能開

法華文句卷八
者表本地久成衆所不識若發迹顯本了達無疑此
卽起後也若塔從地出表法身顯與餘經亦同亦異
菩薩顯法身則同二乘顯法身則異若塔在空開門
見佛表發迹顯本與餘經永異若塔來證前事已彰
灼蓋不須疑塔來起後密有其意衆所未知今取後
義預作此釋亦復無咎觀心解者依經修觀與法身
相應境智必會如塔來證經境智既會則大報圓滿
如釋迦與多寶同坐一座以大報圓故隨機出應如
分身皆集由多寶出故則三佛得顯由持經故卽具
三身普賢觀云佛三種身從方等生卽此義也有人

分此品下十一品是神通身輪開本迹從彌勒問下
是說法口輪開本迹本迹意未彰從此分文太早云
云此品有長行偈頌長行有三一明多寶涌現二明
分身遠集三明釋迦唱募初文有六一塔現之相二
諸天供養三多寶稱歎四時衆驚疑五大樂說問六
如來答七寶爲塔者明法身之地以性得七覺七聖
財寶塔者實相之境法身所依處也高五百由旬者
是二萬里豎明因中萬行果中萬德也廣二百五十
由旬卽是一萬里橫用萬善莊嚴也地者無明心地
也以無所破破於無明以無所住住第一義空種種

寶物者衆多定慧而莊校也欄楯是揔持也龕室千萬者無量慈悲之室亦是無量空舍幢幡是神通勝相也垂寶纓絡者四十地功德上莊嚴法身下被衆生也寶鈴萬億者八音四辯也四面出香者四諦道風吹四德香也高至四天王宮者窮四諦理也從三十三天下第二諸天供養事解可知更復約理三十心爲三十三地爲一等覺爲一妙覺爲一合爲三十三同依實相境也雨天曼陀羅者初心亦具四十二地功德後心亦爾皆以四十地所有因花歸向法身也餘諸天龍下卽是內凡外凡等亦依實相向果行

因也爾時寶塔中下第三多寶稱歎正證前開權顯實不虛也平等大慧者卽是諸佛智慧如前行步平等義也平等有二一法等卽中道理二衆生等一切衆生同得佛慧大者如前高廣義也約觀心者空觀豎等假觀橫等中觀橫豎平等平等雙照卽是平等大慧也如是如是者一如法相是二如根性是也皆是真實也如法相說故言真實也爾時四衆見下第四時衆驚疑文有二一得法喜二者疑怪也爾時有菩薩下第五大樂說因疑請問若望下答意應爲三問一問何因有此塔二問何故塔從地出三問何故

發是音聲也爾時佛告下第六佛答此三一先答第
二問此佛有願爲證法華故從地涌出也彼佛成道
下追答第一問由彼佛命令造此塔也次其佛以神
下第三答第三爲作證明故發是音聲也釋論明多
寶佛不得說法而取滅度師解不爾彼佛告諸比丘
比丘卽是受化之人何謂不說當是多寶亦得開三
不得顯實故釋論云不得說法耳以是義故雖復滅
度在在處處有說法華經便隨喜作證也大樂說以
如來神力下第二明分身遠集就此有七一樂說請
見多寶二應集分身三樂說請集四放光遠召五諸

佛同來六嚴淨國界七與欲開塔釋初請云承佛神
力者欲開塔須集佛集佛卽付囑付囑卽召下方下
方出卽應開近顯遠此是大事之由豈非佛神力令
問也餘段如文爾時佛放白毫下四放光遠召三變
土淨者此正由三昧三昧有三初變娑婆是背捨能
變穢爲淨次變二百那由他是勝處轉變自在後變
二百那由他是一切處於境無闕又初一變淨表淨
除四住次一變淨表淨除塵沙後一變淨表淨除無
明是時諸佛坐師子座第七與欲開塔復五一諸佛
問訊說欲二釋迦開塔三四衆皆同見聞四二佛分

法華文句卷之二
座而坐五四衆請加諸佛同與欲開塔如僧中作法
與欲意也大集明若干佛與欲華嚴亦說十方若干
佛同說華嚴大品亦云千佛同說般若皆不云是釋
迦分身準今經者應是分身彼帶方便故時中不顯
說耳今經非但數多亦直說是分身咸來與欲也爾
時釋迦見下第二開塔者卽是開權見佛者卽是顯
實亦是證前復將開後如卻關鑰者卻障機動也以
大音聲下第二釋迦唱募覓流通人復爲三一大聲
唱募如來不久下第二明付囑時至佛欲以下第三
明付囑有在在者若佛在世隨機利物自說正法

無待他人今佛化緣機盡欲令此法利益無窮故須
付囑流通也付囑有在者此有二意一近令有在付
八萬二萬舊住菩薩此土弘宣二遠令有在付本弟
子下方千界微塵令觸處流通又發起壽量也偈有
四十八行頌上三意初有三行半頌多寶滅度第二
有八行半頌分身集第三有三十六行頌釋迦付囑
前二如文告諸大衆下第三復二初八行半舉三佛
以勸流通次有二十七行半舉難持之法以勸流通
就初有三初一行半募覓其人次其多寶下第二有
三行正舉三佛以勸持經次其有能護下第三四行

能持此經卽是供養三佛及見三佛以釋勸意諸善
男子下第二二十七行半舉難持之法以勸流通復
二初二十行正舉勸二七行半釋勸意就初復三初
一行誠勸次諸餘經典下第二十七行正舉難持以
勸流通後我爲佛道下第三二行釋難持意若有能
持卽持佛身此意豈易第二諸善男子我於下七行
半明能持難持能成勝德以釋勸意就此復三初一
行半重募持經人次此經難持下第二一行半明能
持難持則諸佛喜歎次是則勇猛下第三四行半明
能持難持卽成勝行勝行有自他也恐畏世者天竺

名沙悖此云恐畏天竺云毘陀此云賢劫之異

名耳

釋提婆達多品

生時人天心熱因此立名卽因緣釋名也因行逆而理順卽圓教之意非

餘教意也本地清涼迹示天熱同衆生病耳

寶唱經目云法華凡四譯兩

存兩沒曇摩羅刹此言法護西晉長安譯名正法華
法護仍敷演安汰所承者是也鳩摩羅什此翻童壽
是龜茲國人以僞秦弘始五年四月二十三日於長
安逍遙園譯大品竟至八年夏於草堂寺譯此妙法
蓮華命僧叡講之叡開爲九轍當時二十八品長安
宮人請此品淹畱在內江東所傳止得二十七品梁
有滿法師講經一百徧於長沙郡燒身仍以此品安

持品之前彼自私安未聞天下陳有南嶽禪師次此
品在寶塔之後晚以正法華勘之甚相應今四瀆混
和見長安舊本故知二師深得經意提婆達多亦言
達堯此翻天熱其破僧將五百比丘去身子厭之眠
熟目連擎衆將還眠起發誓誓報此怨捧三十肘石
廣十五肘擲佛山神手遮小石迸傷佛足血出教闍
王放醉象蹋佛拳花色比丘尼處安毒十爪欲禮佛
足中傷於佛是爲五逆罪若作三逆教王毒爪並害
佛攝以其應行逆生時人天心熱從是得名故言天
熱此迹也若作本解者衆生煩惱故菩薩示熱同其

病行而度脫之此品來意引古弘經傳益非謬明今
宣化事驗不虛舉往勸今使流通也文爲二一訖生
佛前蓮花化生明昔日達多通經釋迦成道二從於
時下方多寶所從菩薩下明今日文殊通經龍女作
佛稟教尚然宣通之功益豈不大矣故提婆達受記
文殊可以意知云第一有三一明往昔師弟持經
之相二結會古今三勸信第一有長行偈頌長行有
四一明求法時節二於多劫中下正明求法三時有
仙人下明求得法師四王聞下明受法奉行第一如
文於多劫中下第二復二一明發願爲欲滿足下二

明修行行中復二一明欲滿檀那勤行布施如文二
 時世人民下明為滿般若推求妙法偈有七行半頌
 上長行初二句頌第一求法時節次雖作下第二一
 行半頌第二正求法次時有阿私下第三一行半頌
 第三得說法師時王聞仙言下第四二行半頌受法
 奉行後亦不為已下第五一行半結證勸信告諸比
 丘王者下第二結會古今復二一正結會古今如文
 由提婆下第二明師弟功報俱滿滿中復二先明弟
 子因報已滿次佛告四眾下第二明法師妙果當成
 弟子中復三先明因滿次三十二相下明果圓後皆

因提婆下結證由通經者益初具足六波羅蜜者度
 義甚多如大論說捨依正名檀防止七支名戒打罵
 不報名忍為事始終名精進四禪八定名禪分地息
 諍名般若又若束十善為六者不殺至不妄語是檀
 不兩舌是尸不惡口是忍不綺語是進不貪瞋是禪
 不邪見是般若菩薩善戒第十云六波羅蜜有三種
 一對治謂慳惡瞋怠亂癡云二謂相生謂捨家持
 戒遇辱須忍忍已精進進已調五根根調知法界三
 謂果報富具色力壽安辯又餘經云施報富戒報善
 道忍報端正進報神通禪報生天智報破煩惱如是

法華文句卷八下
十一
等例皆是三藏明六度相也若施受財物三事皆空
名檀不見持犯名戒能忍所忍不可得名忍身心不
動名精進不亂不味名禪非智非愚名般若如此流
例卽通教中六度相若言檀有十利伏慳煩惱捨心
相續與衆生同資產生豪富家生生施心現前四衆
愛樂處衆不怯畏勝名徧布手足柔輒乃至詣道場
恒值善知識戒有十利者滿一切智如佛所學智者
不毀誓願不退安住於行棄捨生歿慕樂涅槃得無
纏心得勝三昧不乏信財忍有十利者火刀毒水皆
不能害非人所護身相莊嚴閉惡道生梵天晝夜常

安身不離喜樂精進有十利者他不能折伏佛所攝
非人所護聞法不怠未聞能聞增長辯才得三昧性
少病惱隨食能銷如優鉢花增長禪有十利者安住
儀式行慈境界無悔熱守護諸根得無食喜離愛欲
修禪不空解脫魔羅安住佛境解脫成熟般若若有十
利者不取施相不依戒不住忍力不離身心精進禪
無所住魔不能擾他言論不能動達生歿底起增上
慈不樂二乘地四事應修檀一修道者破慳貪故二
莊嚴菩提故三自他利益欲施施時施已皆歡喜名
自利飢渴者得除是名利他四得後世大善果後世

法華經卷第八
獲大尊賢饒財四事應持戒自修善法滅惡戒莊嚴
菩提攝衆生卧覺安不悔恨於衆生無害心後受人
天得涅槃等樂四事應修忍修忍除不忍莊嚴菩提
攝衆生彼此離怖畏後世無瞋眷屬不壞不受苦惱
得人天涅槃樂四事應須修精進進破懈怠莊嚴菩
提攝衆生增善法是自利不惱他是利他後得大力
致菩提四事應修禪定定破亂心莊嚴菩提攝衆生
身心寂靜是自利不惱衆生是利他後受清淨身安
隱得涅槃四事應修般若智慧破無明莊嚴菩提攝
衆生智慧自樂是自利能教衆生是利他能壞煩惱

及智障等是大果如此流例是別教明六度相也月
藏第一云若衆生唯依讀誦求菩提是人爲著世俗
尚不調已煩惱何能調他是人著嫉妬名利富貴高
心自是輕慢毀他尚不得欲界善根況色無色善根
況二乘菩提況無上菩提如星火不能乾海口氣不
能動山藕絲不能稱岳何者世俗不能滿菩提何者
是第一義謂造一切福事若修身修心修慧以第一
義熏修則速滿六波羅蜜若行若坐捨攀緣想是檀
捨攀緣不犯是尸於境界不生瘡疣是羸不捨於離
是精進於事中不放逸是禪於諸法體性無生是般

法華文句卷之二
若復次於陰捨是檀不計念陰是尸於陰無我想是
羸於陰起怨想是進於陰不熾然是禪於陰畢竟棄
是般若於界捨是檀於界不擾濁是尸於界捨因緣
是羸於界數數捨是進於界不起發是禪於界如幻
想是般若如是等是名第一義諦善巧方便甚深法
要能滿六波羅蜜以此法自爲爲他三世菩薩悉修
是法成菩提故非世俗也此法能息衆生煩惱道苦
道安置菩提道華嚴七地方明念念具十波羅蜜修
習一切佛法以求佛道善根與一切衆生是檀能滅
一切煩惱熱是尸於一切衆生無所傷是忍求善無

厭是進修道心不散常向一切智是禪忍諸法不生
門是般若能起無量智門是方便求轉勝智是願魔
邪不能阻是力於一切法相如實說是智是十波羅
蜜具故四攝道品二解脫一切助菩提法於念念中
皆具足諸地皆念念具足此地勝故如此例是圓教
六度相也次三十二相下明果圓三十二相者足平
如奩底足趺隆如龜背兩相共一修堅固布施千輻
輪但一修安慰恐怖者足跟長手足指長圓直身三
相共一修謂不殺戒七處滿肩頸臂脚一修謂恒作
施主手足合縵及柔輭兩相一修謂四攝足跟直踝

法華文句卷之二
三

不現毛右旋三相共一修恒以善法饒益衆生鹿膊
腸相一修以經書教人不恻皮膚不受塵垢相一修
如問而荅黃金色相一修忍辱好衣施陰馬藏相一
修和合諍訟梵身圓等相手摩膝相共一修慈等心
教導肩圓項光師子臆三相共一修恒令施得增長
萬字相一修不惱衆生紺眼牛王暖二相共一修不
恚愛視衆生頂髻青髮二相共一修諸功德在人前
一孔一毛白毫二相共一修不妄語四十齒白齊二
相共一修不兩舌廣長舌梵音聲二相共一修不麤
惡語師子頰一修不綺語四牙一修離邪命一切衆

生功德等佛一毛佛諸毛功德等一好諸好等一相
諸相等白毫肉髻白毫肉髻百千萬億乃成梵音聲
三十二相因雖各各論其真因者持戒精進精進無
戒尚不得人天身況餘相耶此則三藏教相本也空
無生是通教相本道種智是別教相本實相是圓教
相本八十種好者二十指手足表裏八處平滿踝膝
胫六處好妙肩肘腕六處滿兩髻竒中三處好髓尻
二處馬藏一兩膊二腰齊二脇腋乳六腹胸背項四
上下牙上下唇齧兩頰兩鬢兩目兩眉兩鼻孔額兩
腋兩耳頭圓若分別四種好義準相可知告諸四衆

下第二明師妙果當成師中復三初明正果成分陀
利經云調達作佛號提和羅耶漢言天王國名提和
越漢言天地時天王佛住世二十下第二明化度時
天王佛般涅槃下第三明滅後利益佛告比丘下第
三勸修如文蓮華化生者胎經云蓮華生者非胎卵
濕化之化生也非化而言化耳實不如四生中之化
生也請觀音云蓮華化生爲父母無量壽觀云處華
臺久者爲胎生實非胎也例蓮華生者亦稱溼卵而
非溼卵云於時下方者第二明今日文殊通經利
益復二初明文殊通經二從文殊言我於海中下明

利益第一復五一明智積請退分陀利經云下方佛
所從菩薩名般若拘羅漢言智積二釋迦下明釋尊
止之令待通經利益之證智積謂多寶爲證經故出
勸物流通旣訖是故請還釋迦止者雖迹門事訖本
門未彰故託在文殊以留多寶佛之密意非菩薩所
知從爾時文殊下第三文殊尋來四智積菩薩下智
積問所化幾如五文殊師利言下文殊答非口所宣
也就第五復七一答利益甚衆所言未下第二蒙益
者集證此諸菩薩下第三皆是文殊所化本聲聞人
下第四本聲聞人先稟權教住二乘道分陀利經云

蓮華從池出者本發菩薩心其華在空中說摩訶衍
事本發聲聞心者華在空中但說斷生死事從今皆
修行下第五今聞實教悉住大乘法文殊謂智積下
第六文殊結益爾時下七智積偈歎也從文殊言我
於海中下第二明利益文爲九一文殊自敘二智積
問三荅四智積執別教爲疑五龍女明圓釋疑六身
子挾三藏權難七龍女以一實除疑八時衆聞見得
益九智積身子默然信伏第五龍女明圓釋疑初經
敘現申敬次有三行半偈爲三初半行明持經得解
次二行明成就二身後一行引佛爲證罪福者約七

方便傳作今偈深達無罪無福入一實相名爲深達
也十方卽十法界同以實慧朗之故言徧照也具三
十二相者深得法身之理卽備相好如大品明欲得
一切法當學般若如得如意珠也二乘但得空空無
相好也云云第六身子復難先摠難信後釋出五礙
第七龍女現成明證復二一者獻珠表得圓解圓珠
表其修得圓因奉佛是將因剋果佛受疾者獲果速
也此卽一念坐道場成佛不虛也二正示因圓果滿
胎經云魔梵釋女皆不捨身不受身悉於現身得成
佛故偈言法性如大海不說有是非凡夫賢聖人平

等無高下唯在心垢滅取證如反掌第八爾時娑婆
下明時衆見聞復二先明見聞二人天歡喜彼此蒙
益南方緣熟宜以八相成道此土緣薄祇以龍女教
化此是權巧之力得一身一切身普現色身三昧也
釋持品

二萬菩薩奉命弘經故名持品重勸八十萬億那由
他弘經故名勸持品問何故爾答二萬是法師品初
別命之數故奉旨受持八十萬億那由他等前無別
命止是通覓今佛眼視令其發誓此土通經通經證
驗深重佛意殷勤是故蒙勸而弘故有二意也就文

爲二先明受持後明勸持初文復三一二萬菩薩奉
命此土持經二五百八千聲聞發誓他國流通三諸
尼請記問此諸聲聞已成大士何故不能此土弘經
答爲引初心始行菩薩未能惡世苦行通經復欲開
於安樂行品也第二勸持有長行偈頌長行有五
佛眼視二菩薩請告三佛默然四菩薩知意五發誓
通經眼視默勸而不告言者上來雖不別命而舉持
經功德深厚引證分明多寶分身遠來勸發此之殷
勤事義已足有欲應命宜卽發誓無煩復言又將護
聲聞他方之願故不稱揚也偈有二十行請護持經

法苑珠林卷之二
不復細分尋文可解前十七行被忍衣弘經次第二
一行入室弘經次第三一行坐座弘經次第四一行
摠結請加中阿含第六云阿蘭若此翻無事頭陀此
翻抖擻寶雲經第六云阿練兒處比丘見王王子婆
羅門及一切人來比丘唱善來可就此坐彼卽共坐
彼不坐比丘亦不坐當爲說法令歡喜佛滅後末惡
世不應式比丘雖說戒法而得活而於戒法不樂行
歷五分法身餘一切道法亦是說如鬘鼻人說栴
檀自旣無香亦不自聞天人龍神鳩槃荼終不供養
無戒人餘四分亦是說無有能將妙法來必由淨

戒之所起餘四亦如是若遇垂死最重病痛惱逼迫
極無瘳念佛三昧常不捨一切苦切奪其心彼人自
解是法故則知一切諸法空忍辱鎧者中阿含第五
云黑齒比丘訴佛云舍利弗罵我說我佛疾喚舍利
弗實罵說不舍利弗言心不定者或說罵我心已定
云何說罵如折角牛不觸燒人如殘童子耻不惱彼
我心如地水火風淨與不淨大小便利涕唾受而不
罵心如掃帚淨不淨俱掃又如破器盛脂置之日中
涿涿恒漏自觀九孔常漏不淨云何罵說於他又如
灰蛇狗等繫淨童子頸慙耻自愧不罵說他佛問如

是惡人汝云何觀答人有五一身善口意不善但念其善不念不善如納衣比丘見糞聚弊帛左捉右舒截棄不淨而取於淨念用其身淨以規我身棄其口意以誠我口意又口行淨身意不淨亦念其口棄其身意如熱渴者值多草池披草掬水涼身止渴又意淨身口不淨亦念其意不用其身口如行路熱渴唯牛跡少水我若用掬若手水則渾濁應兩膝跪兩手憑口就吸之以除熱渴又三業皆不淨者雖無可用當痛念之如路見病人安置使穩念此不淨使得值善知識治其三業勿令墮落三途又三種皆淨常念

是人以自訓況念齊願齊如清涼池多諸花草熱渴入中以自蘇息常念境界以去我惡此是三藏教中用苦無常不淨無我空爲鎧也毗婆沙第八云念罵是一語餘皆喚聲終日喚聲於我何爲又此方是卑陋語他方是稱讚語我若念此卑語無處得樂又觀此字罵若顛倒此字卽成讚又罵是一界少分一入少分一陰少分罵少不罵多又誰成就罵罵者成就成就自彼於我何爲又罵是一字一字不成罵二字成罵無有一時稱二字者若稱後字前字已滅又能罵所罵一時同一剎那俱滅於我何爲如是等用空

爲鎧也十七云凡聖俱有三受云何差別凡夫於苦受有二一身受苦二心受憂悲如三毒箭失樂則瞋得樂則喜不苦不樂則癡聖人但有身受而無心受於苦不瞋於樂不愛於不苦不樂不癡三使不能使於使得解脫故有凡聖之異如此等有無差降者此用別教爲鎧也今經明鎧者以念佛爲鎧是念法佛第一義佛卽是法故文云念佛告勅卽法也佛卽是僧僧卽事理俱和毗盧遮那徧一切處也如此之鎧一鎧一切鎧卽圓教鎧也

釋安樂行品

釋此品爲三依事附文法門事者身無危險故安心無憂惱故樂身安心樂故能進行附文者著如來衣則法身安入如來室故解脫心樂坐如來座故般若導行進此附上品文釋耳住忍辱地故身安而不卒暴故心樂觀諸法實相故行進又法門者安名不動樂名無受行名無行不動者六道生成二聖涅槃所不能動旣不緣二邊則身無動搖上文云身體及手足靜然安不動其心常憺怕未曾有散亂則安住不動如須彌頂常住不動法門也樂者不受三昧廣大之用不受凡夫之五受乃至圓教中五受生見亦皆

不受有受則有苦無受則無苦無苦無樂乃名大樂
無行者若有所受卽有所行無受則無所行不行凡
夫行不行賢聖行故言無行而行中道是故名行卽
法門也今更廣事解夫安樂者卽大涅槃從果立名
也行者卽涅槃道從因得名也諸餘因果俱苦如常
見外道行於苦行還得苦果若因樂果苦如斷見外
道恣情取樂後得苦報若因苦果樂如析法二乘無
常拙度加功苦至方入涅槃今言安樂行者因果俱
樂卽是大品如實巧度大經云定苦行者謂諸凡夫
苦樂行者聲聞緣覺定樂行者謂諸菩薩也結七方

便麤因麤果皆非安樂行獨此妙因妙果稱安樂行
也更廣依文釋者安樂行是涅槃道涅槃有三義謂
三德秘藏行有三義謂止行觀行慈悲行止行者三
業柔和違從俱寂卽是體法身行卽上文如來衣也
觀行者一實相慧無分別光卽體般若行卽上如來
座也慈悲行者四弘誓願廣度一切卽體解脫行卽
上文如來室也揔此三行爲涅槃道揔於三德爲行
之境境稱安樂道稱爲行大論云菩薩從初發心常
觀涅槃行道因時用此三行法導三業爲行三業淨
故卽是淨於六根六根若淨發相似解而得入真果

時名佛眼耳等因名止行果名斷德因名觀行果名
智德因名慈悲行果名恩德又因名三業果名三密
因時慈悲導三業利他果時名三輪不思議化如此
觀時無復分別一切諸法中悉有安樂性一切衆生
卽大涅槃不可復滅行於非道通達佛道此卽絕待
明安樂行此行與涅槃義合彼云復有一行是如來
行如來是人安樂是法如來是安樂人安樂是如來
法揔而言之其義不異別亦不異此明寂滅忍法空
座如來室彼明金銀寶樹寶樹卽無漏寶林無漏與
室寂滅忍合金沙大河直入西海卽一實慧與諸法

空合得道女人則無諂曲此無緣大慈與如來室合
彼呼爲無餘義此呼爲無上道又五行義亦與衣座
室意同也問大經明親附國王持弓帶箭摧伏惡人
此經遠離豪勢謙下慈善剛柔碩乖云何不異答大
經偏論折伏住一子地何曾無攝受此經偏明攝受
頭破七分非無折伏各舉一端適時而已理必具四
何者適時稱宜卽世界意攝受卽爲人意折伏卽對
治意悟道卽第一義意也廣法門釋者應明不動門
不受門不行門略不記也此品是迹門流通第四意
若二萬八十億那由他受命弘經深識權實廣知漸

頓又達機緣神力自在濁世惱亂不障通經不俟更
示方法若初依始心欲修圓行入濁弘經爲濁所惱
自行不立亦無化功爲是人故須示方法明安樂行
故有此品來也此安樂行有何次第然法華圓行一
行無量行不可思議何定前後今且一緒法師品略
示弘經則以益他爲本先明入室此中辨惡世弘經
安諸偏惱先著如來衣前後互現耳若約行次者諸
法從本已來常自寂滅相若乖寂起相應先以般若
蕩累則初坐座諸法不生而般若生同體慈悲愍衆
故行道次入如來室旣以慈悲化世必涉違從決須

安忍次著如來衣雖作此次說非行時行時入空卽
具一切法況慈忍耶四安樂行者舊云一假實二空
爲體二說法爲體三離過爲體四慈悲爲體基師云
一空二離憍慢三除嫉妬四大慈悲龍師云一身遠
諸惡漸近空理二除口過三除意嫉四起慈悲南岳
師云一無著正慧二口不說過三敬上接下四大慈
悲天台師云止觀慈悲導三業及誓願身業有止故
離身麤業有觀故不得身不得身業不得能離無所
得故不墮凡夫有慈悲故勤修身業廣利一切不墮
二乘地有止行故著忍辱衣有觀行故坐如來座有

慈悲故入如來室止行離過卽成斷德觀行無著卽成智德慈悲利他卽成恩德恩德資成智德智德能通達斷德是名身業安樂行餘口意誓願亦如是品文有問有答問中先歎前品深行菩薩能如此弘經後問淺行菩薩云何惡世宣說是經佛告下第二答中有三一標四行章門二解釋修行方法三揔明行成之相初標章如文一者安住下第二解釋方法卽爲四別初文又二一釋方法二結行成修行有長行偈頌長行又二初一者下標行近次文殊下釋行近初雙標如文次釋中又二謂行處近處或云內凡初

行名行處若久習純熟漸能近理名近處引前品近果之行爲例也或云行處約因近處約果行處明智近處明境瑤師云七住已上心體於理爲行處已過分段也自此已還無生未能現前漸近於理爲近處同是分段此二是行始通爲一安樂行也私謂初家以行爲淺若大經云十地菩薩以行故見不了了當知行則不淺後家以近爲淺若淨名云近無等等佛自在慧此則近更成深若兩行俱深則成前品菩薩弘經之行不關初心方法若兩行俱淺卽七方便人所行何關圓行方法故不可偏據深淺然行名進趣

近名親習親習故進趣進趣故親習復何淺深又行
近是上方法行處是如來衣近處是如來座座衣既
不淺深行近何得優劣又忍辱必內懷至理歷緣耐
事目之爲行空座必體達外緣棲息真境目之爲近
蓋事理互現復何淺深若爾何故分行近詣理略說
名行處附事廣說名近處說有廣略理無淺深今約
三法明行處一直緣一諦一諦爲一切所歸爲一切
作本而徧無分別一切所歸者卽忍辱地也地卽中
道諸法歸之故名爲地衆行休息故名忍辱此卽行
不行之行也爲一切作本者如萬物得地而生衆行

得理而成若得理本在剛能柔在逆能順在暴能治
在驚能安無量功德從中道地生地無所生而生功
德卽不行行之行徧無分別者則不分別不行與行
差別之相故云又復不行不分別等也卽是非行非
不行無三行而三行故名爲行同一實諦故名爲處
如此行處合上經文休息衆行合如來衣隨生功德
合如來室徧無分別合如來座是名一法釋行處是
弘經方軌也二約二法卽生法二忍二忍卽生法二
空二空異二乘何者人法二空約真俗假實明二空
二忍悉見中道故不同二乘若更開者卽四忍若作

五忍指善字爲信忍若作六忍指和字爲和從忍若對地卽開四十二忍一地尚有四十一地功德一忍寧無四十一忍法耶今且約四忍消文謂伏順無生寂滅忍也此四忍與別教異彼前二忍是生忍位則淺後二忍是法忍位則深今圓生法悉通四忍亦通何者二空理卽是中道初住修四忍入中見二空理乃至後心亦窮二空理大經云發心畢竟二不別若約無淺深判四忍者從初發心圓伏五住至金剛頂皆名伏忍初後悉不違實相名順忍初後悉不起二邊心名無生忍初後悉休息衆行名寂滅忍聞生歿

不忽卒畏苦聞涅槃不忽卒證樂聞佛常與無常二乘作佛不作佛聞生歿涅槃異與不異聞佛道長短難易非長非短非難非易等皆不驚怖行此行者從始至終以二空理忍諸法卽著如來衣安住二空理卽坐如來座愍諸衆生卽入如來室二空四忍名爲行理卽是處是名約二法明行處爲弘經方軌也三約三法三法卽不思議三諦也住忍辱地揔論三諦如有地可據方能忍辱也柔和善順者善順真諦能忍虛妄見愛寒熱等故言善順也而不卒暴心不驚者安於俗諦忍衆根緣稱適機宜故云不卒暴體忍

違從故心不驚也於法無所行等者卽安中諦能忍
二邊故云無所行正住中道故云觀實相亦不得中
實故云不分別此則據三諦之地名處忍五住之辱
名行行亦爲三謂止行卽行不行觀行卽非行非不
行慈悲行卽不行行合上衣座舍等是爲約三法明
行處辯弘經方軌也龍師云住忍辱地揔舉生法二
忍下別明二忍柔和善順明身業也而不卒暴是口
業心亦不驚是意業此就三業明修生忍於諸法無
所行不行有相也而觀如實相行空平等也亦不行
不分別不行無相也有無兩亡會於中道此三句明

修法忍得是二忍結爲行處彼明二忍未知約何若
三教二忍全非法華之義若約圓教不應隔別不融

云

云云何名近下第二近處文爲三遠十惱亂卽遠

故論近亦是附戒門助觀修攝其心卽近故論近亦
是附定門助觀也觀一切法空卽非遠非近論近亦
是附慧門助觀上直緣理住忍辱地今戒門廣出衆
辱之緣應修遠離非持刀仗亦不棄捨但以正慧而
遠離之當知遠近廣上行所不行也上直明不暴驚
今定門廣出修定心修定處修定要門以定力故在
暴而治在驚而安當知卽近論近廣上不行行也上

直明無所行今廣觀一切空具歷諸境無量無邊無礙無障當知非遠非近廣上非行非不行就初有十種應遠者一豪勢二邪人法三兇險戲四旃陀羅五二乘衆六遠欲想七遠不男八遠危害九遠譏嫌十遠畜養等路伽耶此云惡論亦云破論逆路者逆君父之論又路名爲善論亦名師破弟子逆路名惡論亦名弟子破師那羅延者上伎戲亦云綵畫其身作變異又云緣幢擲倒之屬也分十種爲二邊九是生歟一是涅槃二俱遠離卽寂滅之異名耳觀心釋十種

云 近近處有三意

云

妙法蓮華經文句卷第八下

